

四庫全書

史部

欽定四庫全書

浙江通志卷一百六十三

人物二

忠臣一

事君以忠人臣之分也而取義成仁與宣猷佐績者其致身則同而遭遇則異兩浙山川正氣鍾為偉人其間黼黻太平潤色鴻業者固代不乏人而竭忠効命臨難捐軀者亦指不勝屈凜然大節豈

非爭光日月磊磊軒天地者哉志忠臣

杭州府

南北朝

卜天與

南史本傳餘杭人善射宋武帝元嘉中為廣威將軍領左細仗元克劬事變倉卒舊將羅

訓徐罕皆望風屈附天與不服披甲執刀持弓疾呼左右出戰徐罕曰殿下入汝欲何為天與罵曰只汝是賊手射劬於東堂幾中逆徒擊之臂斷倒地乃見殺孝武即位贈龍驤將軍益州刺史謚壯侯給天與家長廩子伯宗殿中將軍明帝泰始初領幢擊南賊於楮圻戰沒

隋

許善心

隋書本傳字務本高陽北新城人祖懋梁散騎常侍父亨在陳歷大中大夫領大著作善

心起家除新安王法曹陳亡高祖遣使拜通直散騎常侍有神雀降於含章閣善心於座請紙筆製頌奏之高祖甚悅除祕書丞大業十年駕幸江都授通議大夫十四年化及弒逆隋官盡詣朝謁賀善心獨不至化及執至朝旋令釋之善心不舞蹈而出化及目送之曰此人大負氣遂害之母范氏撫柩曰能死國難我有兒矣

因卧不食後十餘日亦終

謹按隋書地理志高陽隸河間郡並無新城縣而舊唐書許敬宗傳云敬宗杭州新城人善心子其先自高陽南渡世仕江左是高陽乃善心在北之郡望而南渡後之居於新城無疑矣因從浙江舊志載入并據敬

宗本傳為證

唐

許遠

舊唐書本傳善心曾孫鹽官人初從軍河西為
積西支度判官時仇兼瓊鎮劍南辟為從事欲

以子妻之遠辭兼瓊怒積他事中傷貶為高要尉
後遇赦得還祿山之亂或薦遠素練戎事明皇召
見拜睢陽太守累加侍御史本州防禦使及賊將
尹子奇攻圍遠與張巡姚閻嬰城拒守經年外救
不至兵糧俱盡而城陷于奇執送洛陽害之唐書
張巡傅安祿山反巡起兵討賊河南節度使嗣虢
王巨假巡先鋒巡至睢陽與遠合祿山死慶緒遣
尹子奇將兵十餘萬攻睢陽遠自以材不及巡請
稟軍事而居其下專治軍糧戰具初睢陽穀六萬
斛可支一歲而巨發其半餽濮陽濟陰遠固爭不
聽至是食盡士多餓死巡出愛妾殺以大饗遠殺
奴僮以哺卒至羅雀掘鼠煮鎧弩以食賊知外援

絕園益急士病不能戰城遂陷巡遇害子奇議生
致一人慶緒所乃送遠洛陽至偃師不屈死詔贈
遠荊州大都督子孜婺州司馬立廟睢陽
歲時致祭大中時圖巡遠像於凌烟閣

顏真卿

唐書本傳字清臣師古五世從孫開元中進
士遷監察御史使河隴時五原有冤獄久不

決天且旱真卿辨獄而雨郡人呼御史雨遷殿中
侍御史楊國忠惡之出為平原太守安祿山逆狀
牙藁真卿度必反陽託霖雨增啤濬隍日與賓客
泛舟飲酒以紓祿山之疑祿山反河朔盡陷獨平
原城守具備使叅軍李平馳奏元宗大喜曰朕不
識真卿何如人所為乃若此時平原有靜塞兵三
千乃益募得萬人饒陽濟南清河鄆郡景城各以
衆歸軍聲大震會賊破東都遣段子光傳李愷盧
奕蔣清首狗河北真卿恐衆懼給諸將曰吾素識
愷等其首皆非是乃斬子光藏三首他日結芻續

體為位哭之是時從父兄杲卿為常山太守斬賊將李欽湊等清土門十七郡同日自歸推真卿為盟主兵二十萬絕燕趙詔拜戶部侍郎加河北招討採訪使清河太守使郡人李崱來乞師真卿許之檄清河等郡遣李擇交拒戰賊敗斬首萬級肅宗即位祿山急攻河北諸郡復陷獨平原博平清河固守真卿渡河謁帝詔授憲部尚書遷御史大夫方朝廷草昧不暇給而真卿繩治如平日宰相厭其多言出為馮翊太守轉浙西節度使名為刑部侍郎李輔國遷上皇西宮真卿率百官問起居輔國惡之貶蓬州長史代宗立累遷尚書右丞俄以檢校刑部尚書為朔方行營宣慰使未行留知省事更封魯郡公時元載多引私黨畏羣臣論奏請每論事先白長官長官以白宰相宰相詳可否以聞真卿上疏謂塞絕忠諫載以為誅謗貶峽州別駕遷撫湖二州刺史載誅擢吏部尚書楊炎當

國以直不容換太子少師猶領使及盧杞益不喜
改太子太師并使罷之數遣人問方鎮所便將出
之真卿辭曰先中丞傳首平原面流血吾親舌舐
之公忍不見容乎杞矍然下拜而銜恨切骨李希
烈陷汝州杞乃遣真卿往諭詔可公卿皆失色既
見希烈宣詔旨希烈養子千餘拔刀爭進真卿顏
色不變時朱滔王武俊田悅李納謂希烈曰聞太
師名德久矣欲建大號而太師至求宰相孰先太
師者真卿叱曰吾守吾節死而後已豈受若等脅
耶希烈乃拘真卿守以甲士掘方丈坎傳將坑之
真卿曰死生分矣何多為乃拘送真卿蔡州度必
死作遺表墓誌祭文指寢室壁下曰此吾殯所也
興元後王師復振賊慮變遣將辛景臻安華至其
所積薪於庭曰不能屈節當焚死真卿起赴火景
臻等遽止之希烈弟希倩坐朱泚黨誅希烈怒使
閹奴害真卿曰有詔真卿再拜奴曰賜卿死曰老

臣無狀罪當死然使人何日長安來奴曰從大梁來罵曰乃逆賊耳何詔云遂縊殺之年七十六淮蔡平子頤碩護喪還帝廢朝五日贈司徒諡文忠真卿立朝正色剛而有禮天下不以姓名稱而獨曰魯公善正草書筆力道婉世寶傳之

謹按唐書本傳真卿為師古五世從孫而師古則瑯琊臨沂人也成化杭州府志引海寧志以真卿為海寧人萬歷杭州府志云其先瑯琊人祖昌任鹽官州判卒於官父必寧占籍鹽官又海寧縣東一十五里原吉鄉有公墓則家於鹽官無疑矣今仍之

五代

水邱昭券

兩浙名賢錄臨安人事吳越王佐為內都監使佐欲誅程昭悅令昭券夕率甲士千

人圍其第昭券曰昭悅有罪當顯戮不宜夜興兵未幾佐卒侗嗣與何承訓謀逐胡進思昭券諫不從謀洩難作昭券聞變入衛遂被害進思之妻曰他人猶可殺昭券君子也奈何害之進思後亦悔懼曰我不幸

獨害君子

孫陟

成化杭州府志新城人仕錢氏為尚書任常州防禦時寇盜充斥調兵督戰竟歿於陣呂城為

之立廟以卹禮歸葬墓在所居太平鄉百丈

村之西復立廟於斯雙楓合抱至今猶存

宋

鞠嗣復

宋史本傳宣和初知休寧縣方臘黨破縣欲逼使降而斬二士以怖之嗣復罵曰自古妖

賊豈有長久者爾當去逆從順因我而歸朝官爵尚可得何為脅我降後知必死屢言何不速殺我

賊曰我縣人也明府宰邑有善政我不忍殺乃委之而去初嗣復聞難率吏民修城衆樂赴功守備畧就朝廷知之加直祕閣擢知睦州嘗為賊所傷自力渡江乞師於宣撫使未及而卒

謹按萬歷杭州府志作錢塘人今從之

滕茂實

宋史本傳字秀穎臨安人政和八年進士靖康元年以工部員外假工部侍郎副路允迪

出使為金人所留金尼瑪哈素聞茂實名乃遷之代州又自京師取其弟華實同居以慰其意欽宗自離都城舊臣無敢候問起居者茂實聞欽宗將至即自為哀辭且篆宋工部侍郎滕茂實墓九字取奉使黃幡裹之以授其友人朔寧府司理董誥欽宗及郊茂實迎謁拜伏號泣金人諭之曰國破主遷所以留公益將大用迫令易服茂實力拒不從請從舊主行金人不許憂憤成疾卒誥歸錄哀辭

上其事紹興二年贈龍圖

閣直學士官其家三人

唐恪

宋史本傳字欽叟錢塘人以廕登第調郴尉大觀中祥猗內附召為屯田員外郎持節招納敵

始恫疑衷甲以迎恪盡去兵衛從數十卒單行敵望見懼呼投兵聽命以奉使稱職遷右司員外郎起居舍人迎遼使還言河北邊備弛廢宜及時治之中貴人中以他事降知梓州召拜戶部侍郎京師水暴至汴且溢付恪治之因上疏言水陰類也至犯宮闕天以陰盛之沴做告陛下願垂意時事益微天戒靖康初拜同知樞密院事洎金兵薄城下密言於帝曰宜舉景德故事留太子居守而西幸洛連據秦雍領天下親征以圖興復帝曰當以死守社稷何梟為相京城不守車駕至金營恪曰計失矣既而還宮恪請入覲梟不可復幸恪曰一之為甚其可再乎及金人逼百官立張邦昌令吳

并莫儔入城取推戴狀恪仰藥而死

王稟

杭州府志海寧人當靖康之厄以孤軍守太原敵九攻而九拒之援兵不至矢盡糧絕招之卒

不屈城陷與其子荀入告原廟抱太宗御容抗辭罵賊父子同赴汾水死建炎四年追封稟為安化郡王諡忠壯荀贈右武大夫

恩州刺史名其孫沆襲封

楊九鼎

咸淳臨安志字叔鎮以父由義任入官帥襄漕夔有善政復易利漕帥天漢敵劫大散關

九鼎復之又復皂郊殺偽元帥完顏阿璘後兵再至九鼎死守清野原除太府少卿總領蜀賦詩都統吳政戰沒麾下兵潰敵據漢中擣大安軍九鼎檄張威何進勤於三泉匹馬不返會蜀有新帥首招潰卒至雞公嶺復叛帥挾兵以遁有勸九鼎遁者答曰九鼎有職守不可去賊至遂遇害贈五官

至朝議大夫
官其子三人

史徽

萬歷杭州府志字洵美一云東美鹽官人勤苦力學登崇寧進士累遷戶部郎官出為京西運

判徽宗下詔罪已罷西城所督通賦徽悉焚其租籍進右司郎中以疾致仕高宗即位起為司農少卿建炎三年扈駕至江口遂遇害贈左大中大夫右文殿修撰子龜年岑年皆至員外郎

姚興

咸淳臨安志舊名叔興新城人有勇力善武藝為統制官隸王權紹興三十一年海陵王南侵

兵至和州尉子橋興以一軍三千人力戰權置酒仙宗山上擁羣刀谷自衛殊不援興興殺賊數百以援不至而沒朝廷為之立祠以表其忠寧宗朝追贈襲慶軍節度使開府儀同三司

謹按宋史以興為相州人
今從咸淳臨安志存之

趙卯發

宋史新編字漢御昌化人卯一作昂以上舍登第權通判池州元兵渡江守王起宗棄官

去卯發攝州事繕壁聚糧為守禦計元兵至都統張林屢諷之降卯發憤氣填膺瞠目視林不能言林以兵出巡江陰降歸而陽助卯發為守兵皆歸林卯發知不可守乃謂其妻雍氏曰城將破吾守臣不當去汝先出走雍氏曰君為忠臣我獨不能為忠臣婦乎兵薄城卯發晨起書几上曰君不可叛城不可降夫妻同死節義成雙與雍氏盛服同縊從容堂卯發始為此堂名以從容及兵至領客堂中指所題扁曰古人慷慨殺身易從容就義難此殆其兆也卯發死元巴延具棺衾合葬於池上祭墓而去事聞贈華文閣待制諡文節雍氏贈順義夫人錄二子為京官

周宣

瞿佑周宣傳字公猷錢塘人仕職方郎中德祐丙子元師次臯亭宣上表請兵禦之時陳宜中

主降議不報因自集族黨家丁為報國計及元兵
入臨安帝后遠狩宣乃北面泣拜率眾與戰身被
刀矢負痛手格殺數十人隨遇害文天祥以詩哭
之曰孤忠莫克挽顏軍一死名高百戰勲總恨權
奸多異議難禁玉石不俱焚殺身却羨君先我殉
國終當我繼君他日幽魂逢地下血應化碧氣凝
雲

馮驥

兩浙名賢錄字德父富春人性至孝母病刲股
和藥以進登景定進士調安吉武康簿有聲累

遷大理丞時元兵下襄樊朝廷募豪傑為戰守計
驥被薦協張濡守獨松元兵來攻殺其渠帥元將
益兵搗之濡遁驥與弟驥
力戰死贈集賢殿修撰

謝緒

錢塘縣志理宗皇后謝氏之族也世居邑之安
溪德祐二年帝北狩謝太皇太后以病請留元

兵突入宮昇之而去緒大慟作詩二章與其徒訣曰生不能報國恩死當訴之上帝異日黃河水北流是吾效靈之證遂赴水死時苔水陡湧高丈餘緒尸立而逆流舉葬於金龍山之側

元

鄒世聞

杭州府志字聞遠登州黃縣人龔授百戶戍海寧遂為海寧人張士誠陷浙西見元官從

賊者切齒罵不絕口元亡不食而死

龔瑾

嘉靖海寧縣志海寧人曾任知州死元節葬安國寺後詩稿散逸不傳止存蒼雪軒詩云月浸

蒼龍骨雲分翡翠釵九疑愁正斷清夢到書齋

明

袁興

萬歷杭州府志錢塘衛千戶諸暨之戰有劉總管者為賊所執興馳騎突入其陣賊衆披靡斬

首數十級脫劉還及見主帥劉自以為功興恬不之怪亦未嘗以語人人咸服其量軍士嘗乏食興解銀甲易粟活之及王師進功雲南之龍海興從征慨然曰吾此行不生擒渠魁不返也遂力戰死

詔遣使祭贈明威

將軍指揮僉事

謹按明代指揮千百戶多由世襲隸籍浙江故載入人物傳中其非世襲者仍載名宦後倣此

沈道南

杭州府志錢塘人建文時為御史金川之變道南死之

陳鏞

成化杭州府志字叔振錢塘人永樂進士選庶吉士授禮部祠祭司主事宣德二年征交南兵

部尚書李慶贊軍務舉六卿之屬才且賢者自輔遂以鏞與儀制郎中豐城史安同行二人屢進忠

益慶與主將初聽之屢勝繼不納竟至敗被
執鏞顧安曰吾輩見危授命耳皆不屈死

夏誠

分省人物考字克誠錢塘人舉人正統初任沙
縣教諭清慎有志操部使者上其賢擢監察御

史已巳車駕北征誠扈從至土木乘輿陷敵中誠
死於難後朝廷追錄死事忠勤官其子繼先撫州

府知

于謙

湯斌于謙傳字廷益錢塘人永樂辛丑進士宣
德元年授山西道御史巡按江西辨疑獄出數

百人於死從征漢庶人既就縛帝命謙數其罪謙
應聲數百言辭嚴義正庶人流汗伏地不敢仰視

帝大喜五年起遷兵部右侍郎巡撫河南山西於
吏術民事無不精到而尤以足兵食明舉措振綱

紀為急當時三楊當國皆重謙所奏請朝上夕報
可以足得行其志正統中議事京師薦參政孫元

貞王來自代時王振用事以謙無所餽噉之嗾言
官劾謙以久不遷怨望擅舉人自代無人臣禮下
法司論罪未幾貫出左遷大理寺少卿河南山西
民赴闕請留謙者近萬人乃命以少卿復巡撫十
二年召入為兵部右侍郎十四年秋額森大舉入
寇王振挾帝親征謙與尚書鄺瑩諫不聽瑩從行
而謙留治部事土木師潰帝北陷京師大震皇太
后詔邲王監國王御左順門廷臣爭言振罪應族
王倉卒未有以應衆洵洵梓振黨錦衣指揮馬順
及毛貴等捶死之班行亂王懼屢欲起謙直前掖
止之請下令曰順等有罪捶死弗論即遣都御史
陳鎰籍振家械其姪山礫於市諸臣始退王乃起
還官吏部尚書王直執謙手嘆曰朝廷正藉公耳
今日雖百王直何能為皇太后聞之曰國家幸賴
斯人尋進兵部尚書委以軍事加太子太保辭不
許九月景帝即位十月額森自紫荆關入殺掠官

民警報日急侍講徐理言宜及時南遷廷臣多和之謙厲聲曰京師天下本宗廟社稷陵寢在焉百官萬姓帑藏儲蓄無恙一動足大勢去矣奈何欲蹈靖康覆轍乎帝是謙言議始定謙乃奏用王通楊善守京城孫鏗衛穎張軌雷通分兵出戰石亨楊洪柳溥為總兵監以給事中王竑葉盛程信姚夔盡移郭外人入城所至堅壁清野勿與戰通州糧百萬悉散給官軍餘令運入城芻茭不及運者焚之勿資敵謙躬擐甲胄慷慨誓師士人皆感奮額森衆薄城下見嚴陣不敢犯要大臣出議和索金帛帝以問謙謙曰臣受命治軍旅他非所敢聞也乃約戰以大礮擊其營死者數千人額森大阻詔進少保謙固辭額森數遣使通款許歸上皇時大臣王直等請遣迎駕甚力上不懌謙從容進曰天位已定誰敢異議惟君臣大義兄弟至情自當遣使奉迎耳帝改容曰從汝從汝於是遣都御史

楊善等往迎上皇還京師當是時額森既屢犯京師托克托布哈寇遼東布拉珠寇陝西浙江葉宗留福建鄧茂七廣東黃蕭養各擁衆僭號南蠻西蕃復乘間蠢動命將出師變在俄頃謙內固京城外籌邊鎮條畫悉中機宜僚吏受成相顧駭服雖宿將勲臣小不中程律即請旨詰責片紙行萬里外無不惴惴効力帝推誠倚任而口不言功深自斂飭帝嘗賜第闕西謙曰國家多難何以家為取前後所賜璽書袍鎧冠帶弓劍之屬悉加封識歲時一謹視而已謙自奉儉約所居僅蔽風雨平時多宿直房以便朝謁間病痰壅和藥需竹瀝帝為親幸萬歲山伐竹取瀝以賜或言謙柄用太過帝意益堅初徐瑄議南遷因謙言為帝所薄後改名有貞深怨謙石亨初坐事繫獄謙請赦而用之亨乃請官謙子冕府軍副千戶謙曰臣欲為子求官當乞恩君父何必假手於亨耶亨聞而慚憾益甚亨

從子彪驍雄謙數裁抑出彪為大同遊擊叅軍於是憾至切骨太監曹吉祥劉永誠皆與謙共事兵間憚謙凌已亦銜之帝不豫有貞與亨吉祥開南城門復上皇位遂誣謙與大學士王文太監舒良等欲盜金符迎立襄世子都御史蕭維禎責簿坐謀反當族廷鞫時文不勝憤仰首辨不已謙曰亨等意如此辨何為獄具英宗猶豫曰謙實有功若何有貞進曰不殺謙今日之事無名帝意乃決遂斬於東市家屬戍邊謙死之日天日陰霾行路涕泣皇太后聞之嗟悼累日帝亦悔之成化元年詔復謙官赦其家遣行人論祭弘治三年贈太傅諡忠愍萬厯中更諡忠肅建祠墓側曰旌功杭州府志冕字景瞻初以父功蔭府軍千戶及謙被譖死冕坐謫龍門屢上書訟父冤憲廟初事白加謙官諡因復冕官冕請改文資授武庫員外郎歷陞應天府尹致仕冕邁家難放徙窮邊而能閉門却掃

以讀書纂言為事起謫籍
官兩京所在以修謹稱

沈敬

分省人物考字克欽錢塘人正統進士授兵部
主事轉郎中公忠正直為權奸所惡景泰末謫

戍遼陽成化改元詔復其官起拜河南叅政歲飢
民流敬及時賑發全活甚衆計處榆林餽餉供用
不乏轉廣西左布政使時田州黃明倡亂殺逐知
府岑溥敬受督撫檄統衆征勦梟明父子擒斬無
算觸險乘瘴深入賊巢
中毒死朝廷官其子琦

何鼎

兩浙名賢錄餘杭人入內為長隨好讀書知大
義弘治間見張皇后兄弟出入宮禁心甚忿之

以為祖宗法度外人不得至此一日孝宗與張飲
偶起如廁除御冠於典冠者張戲之復帶酒汗宮
人鼎持金瓜候門欲擊之時太監露其事張僅得
脫明日鼎上疏極言之張后大怒梓鼎至撲殺之

投屍
海子

呂忠

嘉靖海寧縣志字守誠其先廬州人世襲海寧所副千戶遂為海寧人正德八年江西姚源洞

王浩八作亂流劫浙東當道檄忠率兵勦捕忠辭其母顧妻鄭氏曰吾母在汝謹事之為臣忠吾不暇內顧矣行至開化賊衆突至郡卒勸曰賊勢甚盛可避之忠怒提刀碎其背曰朝廷養兵百餘年一旦忍忘之耶直前酣戰射殺十數人孤軍無援被賊攢刺墜馬死奉旨陞其子一級

林文貴

嘉靖海寧縣志台之黃巖騎兵也從千戶呂忠征姚源洞賊賊猝至忠力戰死衆遂奔潰

文貴厲聲曰不可負主大呼挺槍刺賊賊擁衆執之脅使降文貴怒罵曰我朝廷命軍豈從爾賊賊縛貴於樹罵不絕口剖腹剗心而死

查約

閩書字原博海寧人弘治進士以南刑部郎出為福建僉事治異等延平邵武暨福州軍相繼

煽亂約以單車諭眾咸戢服擢山東副使進福建左布政使歲游飢下令諸司掾上納者悉出穀分貯諸倉備賑擢撫山東未行侯官人林汝美以殺妻論死繫獄中又車二小劇盜也與汝美同繫二囚私賂守獄卒寬其械遂藏兵瓜中率眾破狴狴出殺令復破府中獄出眾囚相與趨南門將入海約自以故有德於閩出為化誨言未脫口而刃已陷胸矣閩人立祠祀之

姜楫

嘉靖海寧縣志海寧所千戶嘉靖三十二年征倭寇戰死海鹽城外事聞陞其子本所副千戶

孫商偉

富陽縣志富陽人嘉靖癸丑歲貢授福建寧德州教授倭寇入學宮欲挾商偉行商偉曰

我學官也職死學中去此一
步非死所矣遂死夫子像前

吳懋宣

杭州府志杭州衛指揮萬都督表女夫也嘉靖癸丑倭亂海上表聞變命懋宣將之力焚

其巢大破之懋宣乘勝逐寇倭偽遁為所扼懋宣曰死吾職也恨不殲此賊耳重創而死

姚來

舊浙江通志字舜延仁和人萬厯間累著軍功授惠州叅將泰昌元年秋山賊竊發惠州大震

來孤軍深入賊砦戰

沒奉旨建祠惠州

許當辰

舊浙江通志字健菴餘杭人天啟間武進士授廣東旗鼓都司征海寇劉香力戰沒於陣

趙景和

舊浙江通志字萬育天啟舉人為廣德州守下車甫三月馬士英擁兵南下過廣德益無

紀律橫甚景和慮暴兵之害民也諭郭外百姓盡徙入城閉城門不納士英怒縱火破城入殺之百

姓悲思立祠以祀妾秦氏投井死

蒼壁僕錢義匿之得脫成壬戌進士

祝淵

海寧縣志字開美海寧人崇禎舉人時劉宗周負時望疏救熊開元姜埰上斥其官廷臣無敢

言者淵發憤上疏曰流寇方訏不宜遽斥風憲疏入下所司切責之問究主者賜廷杖抗聲曰男兒志在報國安有身上書更指他人者金吾廉其詞直上之遂釋獄甫半日而賊陷京師作絕命詞以死

許文岐

舊浙江通志字我西仁和人崇禎甲戌進士授南京兵部主事進郎中出知黃州府未逾

月賊至文岐伏兵以待賊奔潰奪大旗而還擢下江防道駐蘄州十六年賊乘夜急攻會大雪袍鼓無聲城陷被執檢其臂得印擁至營不遽加害散繫七十日遇黃州舉人曰賊不過什二三良民破脅者過半耳今以柳圈為約可自投殺賊有王固統者洩謀於賊賊密探諸營果有柳圈賊怒遂并

被害贈
太常卿

徐餘慶

舊浙江通志字兆穀新城人崇禎元年以貢授四川珙縣知縣居官清慎吏民懷之會張

獻忠陷蜀所過州縣望風披靡餘慶堅守孤城陷不屈為賊所害

顧王家

舊浙江通志字朔明仁和人以鹽漕御史掾授臨汝州吏目臨汝當襄雒之衝王家兼脩

事嚴保甲詰奸宄繕城堞調糧餉賊畏莫敢犯署邳城縣新令李貞佐至王家以秩滿遣去汝人伏御史臺乞留請攝監軍司馬崇禎十三年逆闖攻汴不克遂犯邳城圍數重王家率敢死士嬰城固守矢竭城陷賊蜂擁入城褫貞佐衣冠倒懸大樹上將斷其舌磔馬王家瞋目曰賊無道至此恨不斬汝以啖語未畢刃亂下竟同日死于國工詩賦賊盡戮邳人將及國國給賊將以藩邸藏金所在

告俟間拾巨石擊賊賊怒支
解之汝人收國屍葬峨嵋山

翁之琪

舊浙江通志字元倩仁和人陝西按察使汝
進孫也初為郡諸生名珏三試不利乃投筆

從戎中崇禎十二年武榜上親簡將材奇之曰神
骨森挺忠孝人也擢第一初任舟山守備平海寇
陳虎移守衢州會金陵失守恸哭自沉於蕪湖
板子磯驚濤逆流屍不沒者三日收其骸如生

王寅

舊浙江通志山陰人徙居錢塘通韜畧膂力絕
人中天啟丁卯武舉以父大經征播功襲紹所

千戶崇禎初遷浙撫守備檢軍伍多脆弱不任決
拾大詭曰昔南塘戚公練浙兵精銳莫敢當天下
稱為鴛鴦隊於是做其法訓練一年而精悍猛鷲
比節制兵遷龍江都司未任調守泗州陵寢盜屯
集磨盤麓寅云彼眾我寡及其未集急擊弗失於
是捲甲趨盱眙殺賊先鋒七大王自午戰至申賊

益四集矢盡力竭衝陣死
贈鎮國將軍賜祭廕一子

翁鴻業

舊浙江通志字一猷錢塘人天啟乙丑進士
以儀部郎出為廣東右叅政分守嶺東以平

海寇出冤獄稱能吏丁丑補山東督學右叅政羽
書旁午一日十警鴻業分校諸郡間語諸生力學
讀書當知世間忠孝事戊寅御史檄鴻業畧兵備
分守濟南東昌已卯正月大霧晝晦城潰投烈焰
死以

俞起蛟

舊浙江通志字芝雲錢塘人以明經起家拜
魯憲王長史憲王薨肅王立欲廢世子起蛟

察世子孝從容入告力持得免肅王薨世子立值
歲大歉起蛟勸王賑飢自出祿二千石繼之泰山
盜李青山聚黨劫掠勢張甚起蛟與范黃門淑泰
力戰俘其衆崇禎十五年兗州破魯王死起蛟率

家屬二十
三人死之

陳潛夫

舊浙江通志字元倩仁和人崇禎丙子舉人選授開封府推官明亡至山陰抵小楮村謂

其妻孟氏曰勉之吾為忠臣而為烈女孟氏笑曰此吾心也與其妻櫛髮更服以待潛夫整衣冠拜祖父像已拜別其母與弟携妻妾至化龍橋皆沉於河

王道焜

舊浙江通志字昭平錢塘人父國柱以萬厯舉人為廬州推官治獄多所平反道焜辛酉

舉於鄉為福寧教官旋令南平邑為閩海孔道道焜至飭保甲練軍實嚴讀法捐倉廩具有方畧遷南雄同知時光澤有妖寇之亂閩父老乞請留道焜加同知銜知光澤縣事道焜單騎入賊營諭以利害賊皆散去一邑以安崇禎時陞兵部職方司主事明亡與陸行人培同日自經死子均崇禎壬

午舉人

陸培

舊浙江通志字鯤庭吉水令運昌之子運昌任永豐吉水多吏蹟培與兄圻弟楷並馳名一時

崇禎庚辰成進士授行人南還父卒培自留都奔赴長跪座前以手批頰頰盡腫齧其臂血淋漓聲淚俱下明亡入橫山桐塢嶺作絕命詩二章遂自經死著有威鳳堂文集行世

姚竒允

舊浙江通志字有僕錢塘人崇禎庚辰進士癸未廷對時李闖漸逼京師念時務最急者

莫如東宮監國守南京白於都御史李邦華華即拜疏上心動會有沮之者遂不果謁選得南海縣尋以守贛死於贛子端字以式亦死柳州

周宗彞

舊浙江通志字五重海寧人崇禎己卯舉人少出吳太沖章正宸之門為人有膽決尚氣

節太沖正宸數稱之曰周生吾道干城也後殉
難妻卜氏二妾朱衣紫衣及弟啟琦皆死焉

俞元良

舊浙江通志字仲驥海寧人崇禎癸
未進士明亡與其兄元禮同死之

諸復

杭州府志字子葭仁和庠生明亡巾服詣櫬
木營死之錢塘令顧咸建殮其屍葬秦亭山

方天眷

杭州府志字維嶽仁和庠生安貧力學避居
石人塢授徒講讀日採薇蕨以自奉明亡乃

正衣冠再
拜自剄死

國朝

高咸臨

杭州府志字與侯仁和人讀書負氣節順治
乙酉選貢任福建永安令時寇盜四起咸臨

下車撫循百姓遠近稍集丁亥賊陷建寧擁眾犯
永安咸臨防禦倭顯宗從弟其翰中表吳之璜先

後悍賊死相拒五閱月而救不至糧絕隣邑盡陷咸臨奮勇數獲賊磔之城陷被獲脅降不屈死之

詔贈福建按察司僉事

賜祭葬廕一子鳳采

潘名世

廣東名宦冊仁和人順治初為保昌令律已以廉愛民如子李成棟未叛之前檄民輸布

千匹名世力爭成棟怒坐以他事戮於市籍其家無長物百姓莫不流涕

吳夢鼎

錢塘縣志字仲鎮錢塘歲貢順治二年巡撫張存仁委攝蘭谿縣事遇土寇不屈死父敏

惠捐建城東土壩居人呼為吳公壩

錢法裕

山西名宦冊遼東籍仁和人順治三年任蒲州知州政舉民安姜瓖之亂城陷被執不屈

死事

聞贈布政司叅議

賜祭葬

吳允焯

公舉事實字弘文仁和人順治三年由貢士隨征福建有功授建寧府壽寧縣知縣四年山寇

四起乃招集義勇身先禦寇以衆寡不敵被執腦髓懸樹體無完膚罵不絕口而死妻瞿氏常勸允焯盡忠勦寇勿以身家為念聞夫被害投緇死蒙

恩卹贈廢一子垣

潘際昌

福建名宦冊仁和人順治三年隨征入閩知永清縣事適土寇遽起嘯聚攻城際昌率民

兵登陴守禦百餘日外援不至城陷投井死

胡萬鑑

福建名宦冊仁和人順治三年以通判隨征入閩授永清縣學司訓土寇薄城率諸生募

民兵登陴捍禦百餘日城陷被執不屈死之

沈孚建

福建名宦冊錢塘人順治四年知政和縣山寇陷城被執罵不絕口死之

鄔象鼎

殉難錄字符九仁和人順治己丑進士備兵羅定時獯獮反側象鼎提師深入不數月而

殲厥渠魁諸砦底定西賊破桂林掠高肇遂逼羅定象鼎率長子元裸侄聯珠元珣伏弩四布砲石並發擒斬二千餘人賊遁既而敗兵旋集悉眾攻圍累月不解糧絕外援不至謂元裸曰死職吾事也爾無官守盍歸元裸泣願賫檄乞援隣封夜緇城出為賊所得攻圍益急象鼎督兩侄攘臂突圍奮力殺賊眾寡不敵亦為賊獲城陷賊縛元裸至前露刃脅降象鼎罵曰吾豈愛吾子以背吾君耶元裸遂遇害象鼎被幽別室抗節不屈絕食七日死聯珠元珣并家屬五十七人咸殉難

詔贈光祿寺正卿

諭祭葬廕一子作霖入監

王起彪

江西通志字虎子錢塘人順治丁亥進士戊子授德興縣知縣值江右有金逆之變起彪

隨征南大將軍營次半載已丑江西平就任時饒郡巨寇雖滅而餘孽竄伏山谷者間竊發隣邑董三等賊擁衆猝至起彪率民兵守之寡不敵衆被執幽於天君廟脅之降不屈遂遇害雍正六年

詔賜廟

祀

洪恩宣

杭州府志字成之臨安人邑諸生時山寇未靖縣令劉允燦奉文勦撫恩宣願往至賊巢

諭以大義不從遂遇害令高其成
為之勒碑置田七畝給其子供祀

王萬鑑

錢塘縣志字人玉其先山陰人四世祖徙錢塘遂為錢塘諸生順治戊子鄉貢授福建藩

幕攝將樂縣事土賊吳揚為亂萬鑑下車給帖招徠旬日之間化寇為民尋陞萬年縣知縣值閩逆

倡叛萬鑑恢復縣治持守久之赴省請益兵為阻
險計甫出北門而賊猝至萬鑑力戰以拒被砲石
擊死事

聞贈參議

賜祭葬廕一子國治

汪士湄

鄉賢留祀冊錢塘庠生慷慨有志節甲寅闖
變獻策隨征乙卯奉委招撫直入賊巢為逆

黨曾養
性所害

謹按紹興府志蔡佳傳佳偕同知汪士湄入賊
營不屈被害是殉難時士湄已授為同知矣

謝廷謨

公舉事曾於潛人順治十三年歲貢授處州
雲和訓導課文興行士風丕變康熙十三年

耿逆叛攻陷處州廷謨懷印入山號名
義勇被執勒授偽銜不屈絕食而死

趙燾

杭州府志仁和人順治丁亥武進士任象山右營叅將康熙乙卯勦賊至貓頭洋賊斬偽都督

周貴旋因風勢失利左右皆不能為力燾鼓勇當先手刃數人力屈被害

賜祭葬贈副將廕

一子守備

嘉興府

五代

高渭

海鹽縣圖經彥之子初從彥在湖武肅王巡衣錦城會有徐綰之亂焚掠郭郭將及內城彥聞

變遣渭赴難渭言今日不利彥曰赴難之急何顧忌辰亟促渭行渭遂率所部徑趨靈隱山為賊伏

兵所害後淮人檻送綰歸王剖心祭渭

屠瓌智

皮光業屠瓌智墓志字寶光其先河東人後徙澉川之青山遂為海鹽人乾寧四年遷越

州指揮使光化三年調守湖州借刺史高彥子渭抵賊壘矢盡援絕為伏兵所害贈忠義軍匡國功

臣武康

節度使

宋

朱張恂

舊浙江通志字宗厚嘉興人試入上選為省元值車駕避元兵於崖山張恂率舟師勤王

力戰多所斬獲會風雨大作與樞密陸秀夫同日溺海

元

俞庸

弘治嘉興府志字子中嘉興人為平江路推官淮兵壓境庸募勇士鑰守盤門郡僚高安等謂

庸曷不俱竄庸厲聲曰公等以世臣守大城一旦臨利害先民遁逃不顧義與恩耶高安持鐵簡擊庸仆地遂開門兵至城下庸未甦被擒置諸馬上甦以計脫去微服間道歸久之太府知其人將授以爵謝之曰吳門之役吾有死所今日之生出不幸耳尚負面授他命見天日乎因痛憤卒

黃中玉

貝瓊黃中玉哀辭序攜李人以父廕授江山縣尉時海內鼎沸詔徙行臺於紹興以控制

閩越至正丁酉擢為叅謀統鄉兵守衢婺越二年城陷遇害一門十三人俱沒長子孟輔出而僅免

明

金綱

萬厯秀水縣志舉元鄉試洪武中厯蘇州守百姓苦官民田輕重不齊里胥夤緣為奸利綱上

疏請減重額
得罪賜死

程本立

吾學編字原道桐鄉人明初舉明經秀才洪武九年除秦府引禮舍人補周府禮官進長

史從王來朝被累謫雲南馬龍他郎甸長官司吏目從一僕赴任會所部為逆本立單騎入諭順逆利害衆感悅歸附是冬復變帥潘沐英張統屬本立行縣典兵事且撫且禦本立不避艱險山行野宿自楚雄姚安抵大理永昌鶴慶麗江往來綏輯軍民稍安三十一年奏計入京徵入翰林充纂修官修太祖實錄成改江西按察副使未至聞靖難兵入京自縊死所著有巽隱集

楊任

分省人物考嘉興人洪武間由人才擢知袁州黃子澄一見以國士許之靖難兵起引疾歸事

定子澄出徵兵往約蘇守姚善航海善不可子澄乃至任家共謀大事事泄任與子澄俱被執至京磔於市子禮亦坐死

金鼎

舊浙江通志字宗器秀水人歷吏兵二部
司務陞工部虞衡員外郎死土木之難

滿正

嘉禾徵獻錄世襲海寧衛左所千戶正德中解
軍械之京適劉六劉七騷亂山東遇之力戰賊

數却行次滄州賊大至入見州守欲與嬰城守懦
不能戰適胡世寧至滄遂協力禦之賊圍城八晝
夜不能破尚書張縉疏上其功即遷本衛指揮僉
事調戰桃源賊深入被害有卒倪坦亦死之正贈
明威將軍子朝承襲稍遷指揮副使倭寇八大王
擁衆踰梁庄朝率千戶王繼隆等追之與賊對敵
賊設伏於古廟中突出被殺孫上林輪
刀如飛弓挽二石後逐賊於峽口戰死

馬呈圖

萬應嘉興府志世襲海寧衛指揮嘉靖三十
一年倭犯海鹽呈圖奮勇攻擊生擒真倭二

十四名次年倭首八大王等自青村登岸劫殺所
犯官軍俱經摧敗呈圖提兵出城與戰軍潰直入

賊圍身被三十餘
創殞絕祀英烈祠

姚弘

萬歷嘉興府志世襲海寧衛指揮僉事嘉靖三十三年倭寇侵境督軍防勦屢獲戰功後與賊

遇殺賊四十餘賊潰奔弘殺
入賊巢被賊鏃死祀英烈祠

采煉

萬歷嘉興府志世襲海寧衛指揮嘉靖三十二年倭寇海鹽馬呈圖先馳煉往策應兵潰煉奮

不顧身血戰而
死祀英烈祠

徐行健

萬歷嘉興府志世襲海寧衛指揮嘉靖三十二年倭亂身經二十餘戰斬倭首三百餘生

擒十餘人後被
殺祀英烈祠

李元律

萬歷嘉興府志世襲海寧衛指揮嘉靖三十三年倭入寇奉調領兵防守富陽等處擒斬

倭賊十一人復追戰於孟家堰陣亡祀英烈祠

魏大中

檇李往哲編字廓園萬曆丙辰進士仕行人擢工科給事中辨析邪正搏擊權要轉禮科

晉吏科都給事時南直霍邱令某御史崔呈秀已列薦剴忽饋及大中門大中持疏發覺擊璫不遺

餘力諸小人狼顧無措起而媒孽刑科給事中傅榭首搆汪文言事竄名誣奏文言下鎮撫獄煅煉詞連及大中遂革職杜門讀易傳旨被逮下獄誣訊榜掠無一語惟指堂中扁謂鎮撫許顯純曰此

明心堂莫作昧心堂也未幾斃崇禎登柩白其冤賜祭葬諡忠節建特祠詔長子學泚侍祭焉

王允昌

嘉興縣志字永叔世居桐鄉萬曆辛卯舉人授思州司理陞貴陽郡丞天啟改元檄川兵

援遼奢寧據永寧以叛衛官盡降永寧貴陽屬也允昌度兵寡難拒自誓必死乃以印及錢糧冊遣

吏間道上之撫按亡何賊來索印允昌縊死一門
十三人悉受屠戮事聞給祭葬贈光祿寺卿世襲

錦衣

千戶

費彥芳

嘉禾微獻錄字爾英崇德人萬厯癸卯舉人
知隆德縣崇禎癸酉海賊入平涼畧破靜寧

州來攻隆德直薄土城彥芳倉猝為守禦計城無
兵乃斷一指瀝血為書乞救於分守固原叅政陸
夢龍夢龍星夜率兵援遇賊於綏德城下全軍皆
沒夢龍死之賊遂破隆德彥芳封印北面再拜欲
自經賊掩至被執罵不絕口賊剝殺
之詔贈靜寧州知州廕一子入監

夏祖訓

秀水縣志字仲有崇禎間以歲貢薦舉除雲
南呈貢令沐藩庄兵雜處久恣侵奪祖訓立

法嚴禁兵始不擾土人吾必奎叛據楚雄土兵沙
定洲陰蓄異志沐藩檄徵不赴及亂平始赴調所

過縣邑蹂躪一空祖訓撫馭多方德威並著沙感
愧遣裨將詣謝後沙復勒兵要請加銜不許襲破
沐府走楚雄與定洲相持年餘呈
貢尤為要地勢孤力盡赴水死

徐從治

嘉興府志字肩虞海鹽人萬歷進士知桐城築堤一萬七千餘丈以息水患居官強直棒

殺豪貴蒼頭掠奪民妻者歷陞知濟南府濟南多
大盜從治求勇士孫玉增等二十三人厚督畜之
以待用陞副使分巡兗東携玉增等赴沂州白蓮
教徐鴻儒反鄆城攻陷鄒滕嶧縣聚眾數十萬掠
漕艘僭服改元從治監諸軍進討大破之檻鴻儒
送京師進右叅政備兵濟南論平賊功加山東右
布政使以病歸起山西左布政使備兵薊州喜峯
路兵乏餉而諱圍撫道於蓮化城從治單車入營
變立定薊撫王元雅忌其能因請終養再起山東
左布政使武德兵備道兵叛於吳橋陷登州執巡

撫孫元化從治監軍救登州將孫玉增等八十騎而東敵築三臺礮擊城樓一角從治命植柵補壞垣募死士夜斫營焚三臺敵穿地道穴城從治亦穿濠城中以斷之純絙擲火礮焚穴中臭達於外相持七月餘屍山積從治巡城中飛礮陷顯卒贈兵部尚書賜祭葬立祠廕一子錦衣衛千戶

吳麟徵

檇李往哲編字磊齋天啟壬戌進士崇禎五年授吏科給事中時諫官章正宸抗言觸王

應熊被詔下獄麟徵特疏訟寬又上罷中官疏時行人熊開元上書刺首輔周延儒科臣姜采繼之皆下獄麟徵申救上盛怒麟徵從容言曰小臣愛君忘所禁忌日者天下洶洶首輔安所辭其責延儒忍汗伏地謝死罪流寇迫畿甸麟徵奉命守西直門親桴鼓冲矢石蓐宿城上賊數十萬猝至郭外戍卒四散賊圍城數重中夜發礮墮九火碎几案麟徵神色自若賊偽樹勤王旗叩門請入中官

欲納之麟徵不可麾卒推石布土壅塞之俄而兵部騎士持招勤王幟飛至請出麟徵拒之因轉赴德勝門同守者曰為之奈何麟徵曰事去矣願見天子言狀至午門遇相魏藻德藻德曰上入宮誰為趣起今火石轟然城堆巖峻何遽言事去麟徵度不能達望闕叩額號泣而去止道旁祠下曰吾得死所矣遂入戶自縊

國朝順治間賜諡貞肅

徐世淳

湖廣通志字中明秀水人萬厯戊午舉人兵部尚書必達之子崇禎間由重慶府推官知

隨州時流寇倡亂兵無紀律世淳力為居民保護賊羅汝才圍城募士死守親身登陴屢請救不應城陷世淳猶率鄉兵巷戰中數十創罵不絕口賊手刃之妻妾僕婢同時赴難次子肇樑抱父屍且哭且罵賊刃交加臨死告州人以印所藏處事聞詔贈太僕卿諭祭葬肇樑贈國子監助教

湯執中

嘉興縣志嘉興人以掾史選江西廬陵丞崇禎壬午粵寇入吉安永豐直抵泰和白羊坳

百戶梁學兵寡被殺漸逼郡城執中率民勇集鄉兵禦賊賊突至殺巡檢龍德新民家盡被搜掠執中與賊戰於木湖洲奮勇月賊隊地被害奉旨褒卹

陸燦

嘉興府志字振玉平湖人崇禎甲戌進士授南推官平反冤繫絕饋遺濟人尸祝之己卯

死
陷城

徐一源

河南通志字宙孟海鹽人歸德衛經歷崇禎十五年流寇犯歸德一源分防北門殺賊甚

衆城破猶巷戰
被執罵賊而死

李士標

嘉禾徵獻錄字霞舉嘉興人入國學以積分試上等授上林苑丞遷山東寧海州州同崇

積壬午冷口兵入圍州城甚迫歷三月城中食盡士標疾篤臥起於城上督守益力竟卒於雉堞間城遂陷士標妻沈氏率其妾婢僮僕凡二十三人同日死之

陸士鉉

平湖縣志字古雪八歲能詩性至孝以歲薦授訓導甲申聞變大慟絕粒死

彭期生

嘉興府志字觀民海鹽人宗孟子萬歷進士為徽州府學教授歷陞南昌知府巡撫楊邦

憲風有司建魏忠賢生祠期生力持不可諸院司捐助數千金檄府董其成卒不發一緡丁憂服闋起濟南知府首罷車戶之役及厲民者數十條一郡若更生因重囚越獄坐謫獻賊陷袁臨吉左都御史李邦華請於朝陞湖西道分巡僉事單車西行黃穀為巾朱絲繩繫劍曰斯二物所以報國而狗身者送者失色已而檄守贛州仍守嶺北贛州被圍滇越兵招之出走期生曰此吾死所將安往

乎書絕命詞五紙分授五蒼頭曰五人未必皆
生還有一人者歸此即訃音矣徐起自經死

李毓新

舊浙江通志字喬之自河南徙居嘉興崇禎
間以進士授潮州司理上官廉其才令攝四

篆時惠潮流寇作亂制府屬毓新監紀卒用其議
以平寇攝肇慶篆藩兵與民格鬪寇乘間竊發毓
新步行勸諭肇賴以安未幾閩寇姜世英等犯饒
平大埔先後十餘戰捷奏列毓新首功行取未赴
明亡遂遇害次子
禎先抱父屍死

徐石麒

舊浙江通志號虞求嘉興人舉進士授營繕
主事會逆闖張燬楊左相繼瘞死坐賊各累

千石麒約同里為魏大中僨所坐黃太僕尊素為
石麒鄉舉房師石麒獨力稱貸以輸闖間而嘆之
坐是落職特旨改考功溫體仁當囚石麒斥其私
人尋轉應天府承時大司寇鄭三俊以特讞失上

意下於理石麒麟極陳清直大臣以執法久繫上累至德上諭羣臣曰非不知三俊清安可自恃析律執法召入為左通政歷冢宰痛時事不可為引病歸及明亡北面再拜自縊妻孫氏一女在抱棄之赴水死立而不仆

吳爾壘

舊浙江通志字介之石門人成進士授庶吉士時閩賊警逼召對德政殿奏聯絡土司撫

用義士卓有成畫明亡拔佩刀斷一指授孝廉祝淵曰願寄吾家為信遂死之

陸清原

嘉禾徵獻錄字嗣白平湖人光祚曾孫崇禎甲戌進士知增城縣地瘠多盜清原至引數

騎抵賊巢溫言慰諭賊驚投戈乞命按籍遣歸壬午召對陳時政十事上嘉納之授監察御史條上安攘七議出按福建行部至漳漳故多山寇清原廉得其奸細在城者絕其內應募壯士七百人鼓

而出獲其渠魁斬以狗
明亡自沈於江而死

沈方

嘉禾徵獻錄初名士端字彥方後改名方字大愚桐鄉人崇禎己卯副榜授荆門州同知李自

成與羅汝材合兵至白馬渡方下車數日巡按宋一鶴知其才檄調往黃陂適革左六營自鳳皖西

上犯黃安方以舟師破之江上一鶴欲留方軍中而賊決河灌汴秦督丁啟睿師潰川兵二萬調過

荆門知州以疾去官方馳還攝州事至即詣蜀師勞問開曉大義軍中肅然無犯汝寧陷死之家口

十八人

皆死

胡振芳

嘉禾徵獻錄字來子嘉興人天啟丁酉舉人授慈谿教諭遷知嶧縣降漢陽經厯壬午以

薦量移蘄水縣流寇聚英霍間遂及蘄州邑距寇不百里振芳早夜防禦凡九十日乘城數十戰不

能支為賊所執迫降不從拔刀斫其肩氣絕復甦
舊役德之力負以趨山中有門生遇之將還家調

護未
幾卒

張龍德

嘉禾徵獻錄字鯤化以鄉貢為溧陽縣丞地
濱大江寇盜充斥條江防十二事上之不報

轉湖都司經歷罷歸城破與妻侯氏俱
死女適同邑徐世淳子肇株亦自縊

項嘉謨

嘉禾徵獻錄字君禹嘉興人太學生工詩畫
以武健授蘄遠守備時事掣肘棄官歸明亡

盡東所著詩文於懷率其二子
翼心及妾張氏投天星河而死

國朝

屠洪基

廣東通志嘉興人順治八年令陽山西逆馮
寶犯城洪基繕糗糧督義勇登陴固守賊不

能破總鎮郭升援至洪基出城夾擊圍解截其歸路斬獲甚衆招徠難民還定安集次年寶復與黨曹志建等攻陷連山連州進攻陽山洪基堅守如前賊黨高必正復率步騎萬餘環城夾攻凡四日夜城陷被執不屈罵賊死之適月郭升督兵至覓洪基遺骸得之河南坪

錢楞

福建名宦冊字芄生嘉善人中丞士晉子順治三年隨征入閩署將樂令會山寇吳長文謝七

寶等竊發建寧失守將樂被圍城中無兵楞與丞方抗督領鄉勇登陴拒之堅守九月城破率家丁夏允中沈貴巷戰手刃二賊馬蹶被殺家丁死者數人雍正五年楞孫禮部侍郎以塏陳情事下閣部查議奉

旨卹廕贈按察司僉事祀功臣廟

張行健

表忠冊海鹽人任徽州祁門大洪嶺兼良禾司巡檢康熙十三年饒寇犯境被執賊脅之

降大罵不屈賊怒斫其兩臂罵益甚納之坎中以刃刺其腹呼曰我死必為厲鬼以滅汝遂殞胥役方茂胡振並從死

湖州府

三國吳

吾粲

三國志本傳字孔休烏程人孫河為縣長粲為小吏河深奇之河後為將軍得自選長史表粲

為曲阿丞選為長史治有名績孫權為車騎將軍召為叅軍校尉黃武元年與呂範賀齊等俱以舟師拒魏將曹休於洞口值天雨大風諸船縋絕斷絕漂沒著岬為魏所獲或覆沒沉溺其大船尚存者水中生人皆攀援呼號他吏士恐船傾沒皆以戈矛撞擊不受聚獨令船人取之左右以為船重

必敗策曰船敗當俱死耳人窮奈何棄之所活者百餘人遷會稽太守檄募合人衆與呂岱討平山越入為屯騎校尉少府遷太子太傅適二宮之變抗言執正明嫡庶之分欲使魯王霸出駐夏口遣楊竺不得在都邑又數以消息語陸遜遜時駐武昌連表諫爭由此為霸竺等所譖害下獄誅

晉

沈勁

晉書本傳字世堅武康人父充與王敦構逆為部曲將吳儒所殺勁當坐誅鄉人錢舉匿之得

免勁少有節操哀父死於非義志欲立勲雪恥以刑家不得仕進郡將王胡之異之疏勁清操詔聽之升平中慕容恪侵逼山陵時冠軍將軍陳祐守洛陽勁自表求助効力因以勁補冠軍長史令自募壯士得千餘人助祐擊賊以寡制衆糧盡援絕祐懼不保會賊寇許昌祐因以救許昌為名留勁

以五百人守城祐率衆而東會許昌已沒祐奔岷
鳩勁志欲致命欣獲死所尋為恪所攻城陷被執
神氣自若恪竒而將宥之中軍將軍慕容皝曰勁
雖竒士觀其志度終不為人用赦之必為後患遂
遇害恪還言於慕容暉曰定
洛而殺沈勁實有愧於四海

南北朝

丘冠先

南史本傳字道元烏程人少有節義齊永明
中位給事中時求使蠕蠕國尚書令王儉言

冠先雖名位未升而義行甚重若為行人則蘇武
鄭衆之流也於是使蠕蠕蠕蠕逼令拜冠先執節
不從以刃臨之冠先曰能殺我者蠕蠕也

不能以天子使拜我狄者我也遂見殺

沈浚

梁書本傳字叔源武康人歷山陰建康令入為
中書郎尚書左丞侯景逼京城遷御史中丞是

時外援並至景表求和許之既盟景知城內疾疫復懷奸計遲疑不去皇太子令浚詣景所景曰即已向熱非復行時十萬之師何由可去還欲立劾朝廷君見可為申聞浚曰將軍此論意在得城城內兵糧尚支百日將軍儲積內盡國家援軍外集十萬之衆將何所資而反設此言欲脅朝廷耶景橫刃於膝瞋目叱之浚正色責景曰明公親是人臣舉兵向闕聖主申恩赦過已共結盟口血未乾而有翻背沈浚六十之年且天子之使死生有命豈畏逆臣之刃乎不顧而出景曰是真司直也然密銜之及破張

唵乃求浚害之

章華

南史本傳吳興章華字仲宗家本農人至華獨好學通經史善屬文侯景之亂游嶺南居羅浮

山寺歐陽頎為廣州刺史署為南海太守頎子紇敗乃還都後主時除太市令非其所好乃辭以疾

禎明初上書極諫其大畧曰陛下即位於今五年不思先帝之艱難不知天命之可畏溺於嬖寵惑於酒色祠七廟而不出拜三妃而臨軒老臣宿將棄之草莽諂佞讒邪升之朝廷今封疆日蹙隋軍歷境陛下如不改絃易張臣見麋鹿復游於姑蘇矣書奏後主大怒即日斬之

隋

沈光

隋書本傳字總持吳興人少驍捷畧綜書記煬帝徵天下驍勇之士光預焉及從帝攻遼東以

衝梯擊城竿長十五丈光升其端臨城與戰短兵接殺十數人帝壯異之馳召與語大悅拜朝請大夫未幾為折衝郎及江都之難潛構義勇將為帝復讐宇文化及以光驍勇方任之令其總統營於禁內時孟才錢傑等陰圖化及因謂光曰俯首事讐有覲面目何用生為吾必欲殺之死無所恨公

義士也肯從我乎光泣下霑衿曰僕給使數百人
並荷先帝恩遇今在化及營內以此復讐如鷹鷂
之逐鳥雀萬世之功在此一舉願將軍勉之孟才
領江淮之衆數千人期以營將發時晨起襲化及
語洩化及大懼是夜即與腹心走出營外司馬德
戡等遣領兵馬逮捕孟才光聞營內喧聲不及披
甲即襲化及營空無所獲值舍人元敏數而斬之
遇德戡兵入四面圍合光大呼潰圍斬首數十級
賊皆披靡德戡輒復遣騎射之光身無介冑
遂為所害麾下數百人皆鬪而死一無降者

唐

沈清

西吳里語烏程人為婺州刺史大厯中李希烈
陷汴州清發兵昇山逐逆黨至汴口力戰而死

今昇山有
沈將軍廟

宋

劉士英

宋史本傳宣和間為温州教授方臘陷處州州人爭欲遁士英獨自任責推茂才石礪為

謀主治兵峙糧籍保伍分其地為八隅委官兵統率以鐘為約令民間鐘聲則趨所守堞未幾賊來攻拒守凡四十餘日官軍既至賊潰去靖康初通判太原府金人入境帥臣張孝純欲避之士英率通判方笈將官王稟力止及城陷稟赴火死士英持短兵接戰死之

謹按宋林景熙永嘉忠烈

廟記以士英為霽川人

朱蹕

宋史本傳安吉人知錢塘縣建炎三年金人陷杭州守臣康允之退保赭山蹕白允之率弓手

土軍前後拒敵行二十里遇金兵蹕雨中流矢左右掖至天竺山猶能率鄉兵禦敵後數日遇害

章鑄

弘治湖州府志字子壽吳興人仕忠直郎謹直敢言後以世革歸隱元世祖令故宋官納誥勅

鑄不肯自以世食宋祿坐未嘗北向

宋人之仕於元者皆絕之不與往還

徐俊

弘治湖州府志字英父德清人以明經為國子生率六館諸生抗疏乞誅賈似道疏三上不報

國亡不復仕元至元中累召不起言及故宋時政輒泣然流涕死之日門人諡曰安節先生

游汶

嘉靖浙江通志字魯望德清人咸淳中歷江西江東福建提點刑獄俱有能聲賈似道當國時

事日非汶與論事忠誠懇惻至於流涕遂罷官家居元世祖時抗節不仕叅政蒲大年以遺老奏召為福建總管堅辭不就所衣一布袍書其背曰前宋遺民不問燕居敎會晴雨寒暑未嘗脫解

陳存

嘉靖浙江通志安吉人累官兵部尚書端明制置使宋亡元遣使七徵不起尋遺疾却醫絕食

旬有四

日卒

欽德載

尚友錄吳興人仕為都督計議官宋亡德載不肯送降款元兵帥募生致其人議欲官之

德載裂其板授書即遁隱碧

巖山中楊維禎作詩弔之

元

王簡

閩書字伯敬雷化人家烏程至正中為信州路推官陞福建都轉運副使將行會紅巾賊警報

州民擁馬首拜泣曰賊且至公吾父母忍舍我耶羣詣廉訪使乞留已賊果至簡壘四門募訓練諭鄉民團結各相保頃之賊分道入簡率中子相引兵與戰敗之居數日賊突入簡奮身力戰俄而馬中流矢遂被執賊曰公廉能素著吾屈公仍尹此州簡曰受命守州義當殺賊今有死耳賊強之跪

簡曰此膝可斷不跪賊也賊怒毆之簡嚼舌噴血
賊面大罵遂殺之立而受刃頸斷湧白液如乳體
尚不仆數日面色如生民老稚號哭晝夜不絕簡
死相亦被執賊欲官之相曰汝逆君又殺吾父不
共戴天而尚爾官耶亦死之相妻潘亦被執賊首
欲亂之潘及二幼女皆死焉次子楨襲父爵除紹
興路總管張士誠
陷郡亦不屈死

明

郎理

嘉靖湖州府志字子中安吉人洪武己巳由舉
人授戶部主事山西大歟逋賦上特命理往徵

之未行會雷震謹身殿大赦悉免天下逋負尋詔
止免三分復命理往陞見從容言曰陛下法堯舜
以為治德教加於百姓恩澤遍於四海今已布大
信而復更之如天下何且山西大飢民皆殍死取

非其時似與古兩稅三限之法戾矣臣不敢奉命上怒以所持杖撻之致折金鑽左股理弗為動仍命督徵理陳辭益堅上怒叱令棄市已而悔之賜祭焉

施仕

西江志湖州人任廣信千戶所吏目正德己卯宸濠之變賊黨數百人過信掠永豐欲從間道

趨閩仕時為巡捕追至永豐雙山遇賊力戰不屈死之

臧應奎

分省人物考字賢徵湖州人正德丁丑進士授南京兵部車駕司時中官以進貢索多船

利私載應奎力為裁抑卒譴焉叱左右執之乃遁去丁內艱起補禮部郎中嘉靖初以爭大禮跪門哀慟賜廷杖死於杖下臨絕其從父志觀往視之索筆書云不當與弟應璧異居書罷而逝

凌義渠

韓襄雙忠傳字駿甫號茗柯歸安人天啟乙丑進士選行人三使不辱命考授禮垣旋都

樞垣凡寇敵情形撫鎮功罪口談手畫靡不悉中
機宜當事忌之外遷閩中叅政陞蘇松兵備勅平
福山海寇陞山東右藩與勦梁山賊有城守功陞
南京光祿寺卿踰年召為北京大理寺卿甲申三
月闖寇犯闕夜傳召對疾趨長安門則無人門馬
者拱立達曙門竟不啟返就舍城陷義渠舉首觸
柱血淋漓沾襟旋易緋袍設香案正笏向闕拜復
南望遙拜上父書曰盡忠即所以盡孝男視死如
歸含笑入地矣僕請遺命義渠曰可書我柩云死
節孤臣凌義渠之柩終無他言遂掩扉投繯而逝

國朝賜諡忠介

建表忠祠

溫璜

舊浙江通志字寶忠烏程人舉進士任徽州司
李署歛邑篆明亡語妻茅氏曰吾平生學為聖

賢不過求今日處死之道時女方寤起璜手刃之
茅亦自剄璜抽刀自剄氣未絕復以手抉其喉而

死

嚴覺

江南通志字知非歸安人萬曆丙午舉人知巢縣事崇禎八年流賊陷巢被執不屈闔門罹害

吳士義

歸安縣志字以行歸安人由例貢仕長沙二尹署縣事崇禎中流賊困城數月城陷賊舉

刃相向百姓號慟為請命士義罵不絕口遂遇害全家殉焉事聞贈文林郎

國朝

黎樹聲

舊浙江通志字仲寶烏程人丁卯舉人任福州司李署興化府篆海寇破城樹聲不屈遂

遇害事

聞賜祭葬贈按察使廕一子

徐尚介

德清縣志字于石貢於鄉除靈山令時粵地竊據未下毅然往移署安甫踰月代者至

因容羊城幾一年象郡始通乃往象郡而青牛城
困尚介戎服登陴躬冒矢石解其圍明年五月赴
靈山民皆歎散值歲旱披髮跣禱百姓感其誠稍
稍來附守弁不戒於軍民不安寢是以不敢請益
兵賊乃乘虛而來城中之人皆敵也賊謀而前曰
令何在必殺令尚介厲聲曰我靈山長官徐尚介
也遂格以刃刃絕格以手手創汚血濺衣子修跪
而泣尚介曰丈夫有死我不能為

朝廷捍一邑母收吾骨也奪刀自刎不得為賊所殺子
修及僕朱貴俱死之事

聞贈廣東按察司僉事廕一子修妻陳氏
守貞數十年人稱一門忠孝節義云

尹衡 舊浙江通志字平之歸安人順治己丑進士授
樂平令時江右伏莽未靖乘夜窺城衡格鬪而

死祀忠

節祠

慎淑仞

廣東通志歸安人知羅定州西寇吳子聖破城與州同金芳吏目陳炳新各赴連灘溺死

芳義烏人炳

新山陰人

姚延儒

湖廣通志字爾真烏程人由拔貢順治五年任南漳縣有清惠聲逆賊郝搖旗等陷城被

執罵不絕口死之

賜祭葬贈按察司僉事

車君乘

公舉事實德清人由歲貢順治六年選授廣西柳州府武宣縣知縣時草寇未平君乘赴

任兩月率弟君稷捍禦力盡罵賊不屈同死之妾

陸氏幼子不二僮僕數人盡被難雍正六年奉

旨旌表

浙江通志卷一百六十三

謹案卷一百六十三第二十二頁前五行擢南戶

科給事中刊本闕擢字據温州府志增

欽定四庫全書

史部

浙江通志卷一百六十四至
六

詳校官給事中臣戴璐

檢討臣德生覆勘

總校官編修臣倉聖脉

校對官庶吉士臣潘麈筠

謄錄監生臣王增聞

欽定四庫全書

浙江通志卷一百六十四

人物

忠臣

寧波府

周

文種

越北四州郡總種字會越大夫也事越王句踐夫差敗越兵於夫椒句踐以甲楯五千保於會

使種行成於吳執救養奠除之役吳太宰嚭受越賂勸夫差赦越句踐既歸國屬政於種十年生

聚十年教訓周元王四年越伐吳吳三戰三北遂滅吳種謀居多范蠡遺種書曰越王為人長頸烏喙可與共患難不可共安樂子何不去種稱疾不朝或譖種將作亂王賜屬鏤之劍遂伏劍而死

漢

任光

竇慶四明志字景昇鄞人為縣主簿時海賊作孽令朱嘉將吏人出戰為賊所射傷賊突嘉前

光以身障蔽力戰死嘉獲免還邑出俸厚葬之

宋

鄭覃

宋史本傳字季厚明州人靖康二年貢於鄉建炎四年金人陷明州縱兵大掠覃辟難擊小舟與其兄章妻董同載顧謂章曰萬一不得脫覃豈北面事異國者兄勉主祭祀為兵所掠去迫之使

降卓厲辭罵不屈躍入水中董亦自沈後孫
曾多舉進士累贈太師秦國公董秦國夫人

夏承

寶慶四明志字元茂鄞人以太學上舍登崇寧
五年第靖康間任開封少尹寇犯闕大尹徐秉

哲散文勝根括皇族冀以免死承奮身立爭潛令
諸廂毀棄文勝放散苛留之人紹興二年臣寮疏
列其事國事方殷未及褒表隆興
初特贈三官二年贈左朝議大夫

曹孝先

寧波府志字元思奉化人寶慶中任楚州錄
事參軍李全謀叛遣劉國慶脅犯制置許國

孝先趨入諭之曰制置朝廷大臣犯制置是犯朝
廷也語既為亂軍所射中喉拔箭叱曰誤李全斬
東市非汝曹而誰曹孝先決不求生許制置決不
可殺賊鏗鏃交集血流被體猶登城與國謀血盡
氣微國枕之以磚遂絕事聞
詔賜廟額曰旌忠官其子誥

舒瀛

成化四明郡志字登甫奉化人寶慶二年進士授衢州西安尉兵難猝起瀛先衆捍敵死之朝

廷嘉其忠

官其子模

郭德暢

奉化縣志字黃中開禧五年進士官至朝散郎通判楚州寶慶二年歿於王事官其子

吳從龍

家鉉翁忠節記字子雲奉化人建康府統制紹定初李全犯揚州主帥丁勝遣從龍為先

鋒赴敵馬蹶被執使至秦州諭降佯許之至海陵城下大呼曰我右軍統制吳從龍也馬中矢被執至此揚州城無恙秦城堅宜死守賊無能為也全怒寸齮之罵不絕口以至於盡詔立廟揚秦二州

賜額褒忠官其從弟虎至武經大夫

袁鏞

寧波府志字天與鄞人登咸淳進士第以父憂未即仕見國事日蹙竊嘆曰生為宋臣死為宋

鬼顧無寸兵尺地不能捍禦以固社稷得仗義執言從常山睢陽於地下足矣適元將遣游兵十八騎駐西山之資教寺鏞約沿海制置兼知慶元府趙孟傅將作少監謝昌元共出禦敵二人曰爾第先往我二人當以兵繼鏞遂奮然獨往厲聲言曰汝主無故謀起干戈殘我土宇使我人民宛轉鋒鏞之下天地神人所不容四方忠義之士日夜憤惋勤王之師四至吾恐汝北歸無日也言未竟就執而二人已密往車廡獻版圖迎降矣元將奇鏞才脅令降鏞曰死則死耳不汝從也元將怒縱火燎之鬚髮殆盡詞氣愈厲至死不少變其日家人驚知赴水而死者十有七人

張漢英

兩浙名賢錄奉化人幼聘呂氏女後女雙替請辭漢英曰聘時無恙而今喪明命也卒娶之咸淳間敕守樊城為元阿珠所圍募善泅者置蠟書於髻中潛積草下浮水而出往荆郢求援至

隘口被獲於是荆郢之路絕
出銳師薄樊城漢英死焉

楊恕

成化四明郡志字仲如篤學力行由嵎縣儒學
教諭陞温州教授辟為浙東憲掾分治於衢陞

憲司知事宋祚將危
不食數日赴菱塘死

孫璫

寧波府志鄞人侍郎願質子德祐中知
臨安縣奉母在官元兵至俱殉難死

劉揚祖

續文獻通考字弘宗慈谿人景定三年進士
為州部員外郎見賈似道執政國事日蹙遂
有隱志逾年宋亡改冠裳慟哭及元下詔求賢揚
祖不忍聞遂徙家雲湖山寺之東自號介白散人

終身
不出

元

趙觀光

王祿趙觀光墓誌字觀國鄆人以郡博士弟子員得推擇試吏奉化州遷昌國至正十年

黃巖海寇起州侯特穆爾布哈問計觀光謂州兵寡弱且不諳水戰惟蘭秀二山居民悍勇善鬪習海事若募以厚賞示以重賞必樂為我用擒賊無難矣侯即委之明年從侯引兵出海俄而賊船百餘至觀光獨部民兵與戰至晚無大勝負明日方分給軍饋巡隄上賊船大至觀光持短兵接戰矢石交下後無援兵遂死侯亦遇害

俞述祖

元史本傳字紹芳象山人由翰林書寫考滿調廣東元帥府都事入為國史院編修已而

出為沔陽府推官至正十二年斬黃賊迫州境述祖領民兵守綠水洪并力捍禦之兵力不支城陷為賊所執械至其偽主徐壽輝所誘之使降述祖罵不輟壽輝怒支解之有子方五歲亦死事聞贈

奉訓大夫禮部
郎中象山縣男

明

陳剛

成化四明郡志字子浩鄞人洪武五年徵授延
安神木令神木西北人民甚稀習尚桀鷲剛撫

疲羸折奸宄有小吏白敬臣素稱險黠剛欲譴之
敬臣先覺乃逋引賊入寇與其徒劉繼宣挾刃逼
令降賊剛罵曰汝奴果致賊為逆耶吾與此
邑同存止恨不寸斬汝賊奪剛所佩印殺之

易紹宗

嘉靖寧波府志象山人以戰功授錢倉所千
戶洪武三十四年倭賊登劫湯壘潘家礪紹

宗遂大書於壁曰設將禦敵設軍衛民縱敵不忠
棄民不仁不忠不仁何以為臣書畢命妻李氏具
牲酒生奠之與訣而出乃密令游兵從間道焚賊
舟賊驚還救紹宗率所部直前格戰殺賊無算追

擊至海岸淖深馬陷賊回攻之猶手
刃數十賊遂死焉諭祭葬勒碑旌之

向朴

分省人物考字遵博慈谿人宋丞相文簡公敏
中之十四世孫洪武二十五年命督府都事張

允直訪求人才以朴應詔授獻縣令時兵燹之餘
關荆榛畚瓦礫教百姓農桑與同甘苦流移復業
靖難師起獻當兵衝無城郭朴集民兵激以義勇
與北將譚淵迎戰衆寡不敵被擒不屈懷印受戮
獻民哀之拾遺骸葬道
左萬厯初詔建表忠祠

劉樸

慈谿縣志字維素洪武丙子由太學召對稱旨
授建漳參軍時海寇驚擾樸指示方畧遠近安

堵戍寅考績擢知獲鹿縣教民孝弟務農桑治平
稱第一靖難師南下井陘平山諸邑皆望風歸附
樸獨集民兵拒之曰小臣知有君何知有君之叔
哉不屈而死百姓拾骸骨葬之道旁建取義祠於

郭外以祀之

謹按舊志無劉樸傳亦絕不見於他書即縣志云樸任建漳參軍而漳州府職官志亦無其名特所云建祠祀之似非

無據錄以俟考

戴德彝

備遺錄奉化人洪武甲戌進士第三授翰林院編修陞侍講拾遺補闕直聲振於朝改監

察御史益善其職革除間改左拾遺靖難師既迫與黃子澄齊泰方孝孺練子寧胡閏宋激韓永等日夜畫策防禦後俱死難

陳睦

寧波府志原籍定遠人後家定海父仲和從明太祖起兵屢著戰功被傷成疾未及授官而卒

睦嗣世太祖念父子積久勤勞授世襲正千戶運糧海上建文二年燕兵起命李景隆出征睦隸前

軍次德州與燕兵戰於夾河奮勇直前斬殺數人
會景隆後隊退走遂敗績睦為流矢所中死永樂
登極削籍睦子鑑以先朝父子積功
鳴於朝授定海衛百戶俾世襲焉

張安國

寧波府志定海人建文朝為工部郎壬午燕
兵迫京師安國謂妻費曰余職卑不能帥師
應敵又不能屈膝以事人奈何乃乘舟入太湖聞
金陵陷安國大慟曰食人之祿而偷生於新主之
地恥莫大焉遂與其妻鑿舟自沈

梁田玉

吾學編定海人歷官至郎中靖難兵入金陵
與御史葉希賢俱髡髮為僧避去久之松陽
人王詔游治平寺觀轉藏聞藏上噴噴有聲異之
令人緣藏登絕頂無所見見書一卷載建文時出
亡臣僚二十餘人事紙毀浥字多斷爛不可讀讀
數日稍稍詮錄其可識者得田玉及郭良梁中節

梁良用宋和郭節何洲梁良玉何申凡九人
人僅數言詔憐其忠又得之異因各有贊焉

梁良玉

吾學編官中書舍人田玉之族靖難後訣妻
子易姓名挾微貲走出金陵城逾嶺至海南

寓市肆粥書

為業以死

梁良用

吾學編定海人父子兄弟八人同仕於朝靖
難後相率變姓名避去良用去為舟師已而

死於水或曰梁氏父子兄
弟為舟師投水死者五人

梁中節

吾學編定海人未詳仕何官少好讀老子太
玄經靖難後與郭良棄官同走出京城為道

士入
山去

萬武

萬文

成化四明郡志字世忠祖斌字文質定
遠人元季海內擾亂從明太祖克滁和

真三州授副千戶鎮滁洪武紀元調永平三年征沙漠死於敵詔贈明威將軍父鍾字榮祿襲副千戶十七年守禦定海累策軍功二十八年陞寧波衛指揮僉事三十二年從征花園亦死於敵武襲職僉寧波衛事永樂六年從黔國公於檀舍江征南蠻臨陣攘臂大呼曰為人臣有死而已遂力戰而死弟文字世學事母至孝永樂十年承兄職十六年日本寇犯邊率海艦追斬盜首若干級明年轉禦桃渚忽颶風破舟溺死寧波府志萬氏一門三世四人皆死國事鄉邦重之

潘裡

嘉靖寧波府志字誠夫鄞人永樂中徵修永樂大典授後軍都督府都事宣德元年從安遠侯

柳升征交趾升恃勝有驕色裡諫不聽會賊再至升出戰忽橋斷軍分而敗升欲降裡曰不可惟死而已率所部皆死之事聞官其子凱為進賢學訓導世蠲徭役

張瑄

湯斌張瑄傅字廷玉慈谿人正統己未進士為刑部主事能洞悉疑案決淹獄尚書金濂性聰

察頗輕屬吏瑄抱案請前從容舉所鞫囚數名罪矢口如流不煩省閱濂改容禮焉扈蹕土木死寧

波府志額森入寇權璫王振主親征議瑄首率同曹疏諫不報已而詔選從征官瑄慷慨請行師次

居庸時倉卒出兵軍無紀律瑄策其必敗連疏請還蹕為振所沮及土木而兵潰英宗北狩同列多

散走瑄拔佩刀直前追駕厲聲曰臣與陛下俱出誓不獨入僕陳貴牽衣泣瑄絕裾而馳曰吾不歸

矣遂見殺英宗復辟諭祭於狼山晉階承德郎廕其子圭歷官太原同知

崔源

成化四明郡志字有本世襲寧波衛指揮同知正統十三年閩浙盜起從總兵寧陽侯勦捕累

獲奇功檄禦金華殺賊無算擒陳唐奇等五十人送京署浙江都指揮僉事改檄武義一日火發連

營源倉卒遇敵時二弟澄清在營中相與策馬而誓曰事急矣苟不勝我當死二弟可去澄等應聲曰兄死吾寧忍獨不死乎乃挺身前賊勢猖獗寡不敵皆力戰而死朝廷聞之遣官賜祭俾其子世襲源居家時兄弟友恭斗粟尺幣不以私源或以事歸遲二弟雖日昃不敢先食

朱士亨

嘉靖寧波府志慈谿人少有志操由薦舉任交趾那岸縣知縣以禮義化誨俗為之變交趾陷欲脅之降不屈而死

竺淵

嘉靖寧波府志奉化人登曹鼐榜進士授刑部主事正統八年陞福建參議奉敕守銀坑盜賊

竊發淵往撫諭之盜方猖獗遂死焉上憫其忠官其子盛為安康簿

艾敬

嘉靖定海縣志字肅之世襲定海縣指揮使沈毅有智涖政嚴明正統十四年金華烏龍賊寇

掠內地猖獗不可支當道廉敬才畧檄往征討敬挺身深入射殺數人矢盡力竭應者不繼遂為賊

刃所

馮涇

天啓慈谿縣志字伯清登第授禮部主事轉員外郎武宗南巡偕同官諫上怒罰跪五日杖之

於朝傷重而卒神宗嗣統令有司優恤給米喪葬立顯忠坊以表其里

秦碧

兩浙名賢錄字仲文慈谿人弘治己酉舉人選江西饒州府通判著廉能聲會萬年縣姚源賊

反其黨王重七等陽聽招撫實懷異志碧受檄署萬年時縣治初建百務草創吏胥皆為賊耳目碧苦心經畫眾稍戢而兵使李情謂亂民宜重典特用嚴罰繩之民不能堪遂復叛碧被執賊帥號於眾曰秦爺清廉好官不可害碧厲聲罵曰我朝廷命官豈向賊奴求活耶因顧左右曰官兵何在賊

疑有伏遂遇害事聞詒
立祠旌忠廕一子散官

王相

兩上者舊傳字懋賢資性絕人復嗜學授徒高
錢山中夜誦不輟饑即拾蹲鴟火而嚼之成進

士為庶吉士遷編修以議大禮逮詔獄死杖下相
性篤孝為文原本六經而才更橫溢時馳騁莊列

間學者稱
介塘先生

秦彪

嘉靖寧波府志世為爵谿所百戶嘉靖三十一
年倭寇犯象山攻游仙寨甚急彪曰先人遺我

汗馬勲不死戰而死法何以見先人於地下
乃與弟漢疾馳殺賊力不能支遂俱死焉

汪較

兩浙名賢錄奉化人力挽強弩及刃皆習有司
上於軍門賜以義士關防嘉靖壬子倭寇入奉

化應家棚較率兵射斃千餘倭而身
被傷死當事表其問曰義士之門

宋應澗

兩浙名賢錄字汝觀世襲寧波衛百戶中嘉靖庚戌武舉授正千戶掌印事癸丑隸參將

盧鏜下為先鋒追賊至海寧復從戰平湖戰白沙灣戰金山皆有功及戰上海之史家濱兵敗賊追幾及應澗急反弓發二矢皆中賊貫其額復飛鎗殺四人因迴戈大破之後以疲兵猝與賊遇於海鹽之孟家堰不支而死事聞廢其子千戶仍建祠祀之

陳表

嘉靖象山縣志世襲昌國衛百戶嘉靖癸丑倭寇城急表曰吾力不能敵有死而已遂送母出

城納印於千戶倉猝遇賊奮擊而死時禦寇梅溪者曰趙乾俯禦寇李家壘者曰王永希朱汀父子並奮不顧身以死知縣毛德京申請立祠於山川壇北

楊一

嘉靖定海縣志居金家壘年二十餘膂力絕人嘉靖甲寅倭賊數百登劫其壘一持長矛倡於

衆曰有能殺賊者從我少年從者十餘輩迎賊戰於海塗手殺數倭賊鳴角聚而擬之諸少年潰一獨力戰刺二倭而斃賊忿恨解其屍屠腸而懸之鄉人高其義立祠祀焉

葉紳

韓綱

嘉靖寧波府志紳字朝佩世襲寧波衛百戶善雙刀嘉靖乙卯倭賊入橫石橋

紳領兵策應奮刀獨進應者不繼遂為所殺後二日賊至樟村千戶韓綱復領兵與賊交從兵皆散綱挺身與鬪亦死之

劉隆

嘉靖寧波府志字大昌世襲定海衛指揮使以強幹屢協總諸衛備倭海上寇起隆平之後賊

入康頭隆腹中一流矢見血益奮怒鏖戰卒破賊嘉靖壬子遷把總嘉興統舟師備乍澉當松江七圍賊歸隆扼之焚沈賊舟後會破史家瀆賊隆又扼之沈賊舟澉浦外洋陞署都指揮守備溫處乙

卅倭寇數百將薄瑞安縣隆整兵遽出欲折其鋒
偏將尹千戶請旋師避之隆不聽徑往殺賊十餘
人賊避去迴軍至田間有數十賊伏莽中遽起擊
隆隆不及備遂與尹千戶俱戰死事聞贈都指揮

僉事仍
與世襲

杜槐

寧波府志字茂卿慈谿人值倭寇屢犯內地遂
散家貲結驍勇值縣僉其父文明為部長令團

結保聚槐傷父老以身任之寇薄觀海衛城槐一
呼而羣勇俱集直前斫賊衛遂得全賊又犯鳴鶴
槐率眾迎擊賊走餘姚東山槐追之探有數寇飯
空舍提刀赴之賊伏牆隅揮刃中石刃缺內賊盡
出槐提廢刃當之自午至酉鏖戰不已戮其緋衣
渠帥竟以飢疲力竭而死後賊見黑旗即驚曰杜
兵至矣其麾下士皆願從文明殺賊以復讐寇自
黃巖犯寧海海道檄文明偕畢主簿統兵遮要遇

寇於楓嶺力不能支遂與主簿畢某俱死焉請於朝贈槐光祿寺署丞文明府經歷立祠有司歲時

祭致

王

鎔

慈谿縣志字時化正德丁丑進士授刑部主事巨闡犯大辟內批未減鎔抗疏執奏罰俸者再

遷員外郎郎中改南京兵部車駕司減乘傳者十之四五奏革內使進貢船凡五百艘又清諸衛草場進雲南兵備副使引年歸丙辰倭寇入縣鎔蹈火焚死子兆中兆衡以衛父俱燼焉季子兆庚以恩廕入

太學

錢

鯨

天啓慈谿縣志字叔鳴嘉靖丁未進士授中書舍人選福建道御史巡按遼左丁內艱起按徽

寧順道歸里時倭賊據紹興高埠鯨舫出鯉浦與賊遇左右曰從舟尾逸尚可免鯨叱曰吾憲臣義

不徑竇乃張燈緋衣危坐賊擁入厲聲割刃其家
僮錢富葉秀馮德爭以身衛主僕俱死後賊忽夜
驚曰錢御史領兵至矣
走太湖路絕官兵殲焉

魏鏡

天啓慈谿縣志慈谿人少有勇力善格鬪嘉靖
乙卯倭寇至鳴鶴鄉邑令曹本率眾禦之兵敗

鏡負令走賊追之踰杜湖嶺而南殺數賊賊
斫傷鏡額死寇退令為之泣葬作文祭之

劉夢祥

嘉靖寧波府志世襲定海衛百戶嘉靖三十
四年奉檄領兵駕船出海遇賊犯江南崇邱

夢祥即部兵登途與賊交戰奮勇衝
鋒獲賊首數級力乏寡援遂死賊刃

戎良翰

嘉靖寧波府志定海縣學增廣生素以忠孝
自期嘉靖丙辰倭寇陷慈谿良翰倡義集兵

得百餘人與賊格殺斬首二級賊披靡去已又遇
賊於邱洋良翰力戰賊方蟻聚竟不能支為流矢

所中死監司為之禮葬表其門

姚思敬

嘉靖定海縣志昌國里人任俠尚義嘉靖丙辰倭賊據邵叟思敬倡率丁壯數十百人赴

有司應募殺賊明日思敬赴賊所俟賊出掠遂挺戈迎敵獨殺數賊賊更迭出奇擾之諸赴敵者潰思敬力殫遇害令宋繼祖給貲祭葬扁其門曰義門

劉炯

閩書字光人世為寧波衛指揮使累陞福建備倭總督嘉靖三十五年福清縣被倭官兵屢挫

疥夜襲其巢賊遁炯即提兵由捷徑宵行要賊逸路倉猝布列未備而賊已至部曲散亂僅家兵數人在側炯顧懷印者曰為我保此吾死之矣即挺身執鐵鉞格殺三賊力盡無援賊眾擁至斃於賊刃所揮鐵鉞尚堅執不墜後立廟祀之

王廷輔

廣東通志寧波人雷州衛指揮僉事勇畧過人嘉靖間海上劇賊犯海康廷輔統軍督戰

身先犯敵矢盡力窮而歿當道嘉其義給田以葬崇禎間祀於忠義祠

蔡啓元

嘉靖寧波府志以良家子擊倭廣德累戰功授千夫長嘉靖三十八年官兵禦賊於奉化

同行者俱錯愕不前啓元獨匹馬縱橫與賊逼賊駭散或走或伏啓元手格殺數人會天新雨馬行淖潦中不得出力盡矢空顧左右皆散去僅弟昆元與二三家僮不去啓元瞋目揮劍罵賊曰吾不啖汝肉非夫也死戰良久賊乘間涉河統其背刺之死踰時猶立馬上不墮有司具棺斂給貲歸其喪

胡滾

寧波府志字克源定海人有勇畧倭寇翁洲梅家塾邑令宋繼祖募義兵往禦以滾為長率眾

出海時寇立木柵繞以鹿角四圍皆汙田勢不可破
滾奮勇爭先摩其壘與鬪所部皆烏合士皆奔

滾獨後殿賊突至乃手刃三人力竭為所害弟沛往救同沒於陣

火斌

慈谿縣志字德光觀海衛指揮某之子中武舉嘉靖間倭寇犯界斌統舟與寇戰海上用火毬

焚寇舟殲之屢立奇功後與寇戰普陀山力屈被擒支解投水中

吳德四

兩浙名賢錄慈谿人倭經其廬驅其妻豕德四自田歸遇倭於門揮鋤中其腦仆地弟德

六取倭刀追殺一魁遂以壯勇有聲赫杜槐部每遇寇即衝鋒奪旗以為常海道知其名檄往攻舟

山險寨德四直前斫賊渠於棘門寨內驚擾噪而出怯卒皆返旆走賊斫德四死德六奮呼獨前殺

其殺兄者後兵不繼亦死賊渠被戕寨不能守卒為官兵所破

葉七

兩浙名賢錄定海衛軍賊王直負金塘烈港穴為寇大將俞大猷提舟師直入其港討擊火炮

橫發勝負未分而舟忽挂賊纜檣楫不能施賊眾方逞七徑取斧投水斫其纜未及斷賊以矛刺七貫其項七大呼曰死矣吾必斷其纜連揮數斧纜斷而沈舟遂免後四日大猷卒破賊而空其穴以不得七屍為恨厚恤其家為招魂而葬之

陳大綱

陳應鷗

寧波府志大綱世襲定海衛千戶萬曆二十八年調征川寇楊應龍

至妻山關與賊奮戰陣亡贈都督僉事廢一子指揮世襲其從子應鷗字翼雲邑諸生襲職甲申聞闖賊變不食死

洪應科

寧波府志字媿之定海人萬曆舉人任善化縣知縣剖訟立決民為誥曰公決獄一何速

民供糧不隔宿粟一升可往復故稱爲洪一升云
丁艱服闋補知宜黃縣尋陞順慶府同知時蜀有
奢寇之亂勢張甚總督知應科有膽畧屬監軍事
每抵賊壘所獲無算賊往往自却爲奢將樊龍刺
死贈尚寶司卿廕一
子世襲定海衛百戶

劉振之

慈谿縣志字而強工部侍郎志伊孫常州判
官恬之子崇禎庚午舉人教諭東陽作六約

課士擢知鄆陵縣時張李諸賊蔓延十年又旱蝗
相繼遼練二餉復促之民洵思亂振之至即停
止催科括粟作糜活且萬人鄆歲漕二萬因不能
償振之請從改折不報勞心焦思至廢寢食明年
麥熟請以麥代米當事上其議全豫皆改從麥乃
創鷹揚止戈二社民少壯者治田畢即入社習弓
矢親詣教閱開示君父大義時土賊秦村古城陽
賀沙灘等數十處蛇蟠蚓結皆恃流寇爲聲勢振

之會諸將於朱仙鎮即岳忠武廟歃血誓師取卮酒酌忠武曰將軍盡忠報國丹心未泯亦知五百年後有劉振之乎即日統兵圍古城殲之復連破袁老山一條龍等寨獨扶溝賊徐完擁萬眾聯三邑界振之恐完與闖合招之完即率眾降已而完黨通闖者劫完反振之分兵三路入一敵完一伏五里岡阻隘而一自間道繞完後賊背腹受敵擒斬無脫者完死亂軍中當是時環汴數百里幾無賊後闖自南陽趨汴陷許殺州守有奸民倡言城小力不支宜降振之梟其首以徇集僚佐士民設誓固守手一劍坐卧角樓曰此吾授命處也未幾闖合眾八十萬奄至攻圍城中矢石俱盡遂陷振之猶躍馬巷戰知勢不支乃易服謁先聖東笏危坐堂上賊擁見渠帥欲降之振之大罵曰吾劉氏世以忠孝傳家肯為狗鼠污耶賊怒命火烙徧炙之罵益烈復裸置大雪中三日夜猶罵不絕竟剖

胸屠腸支解死贈太僕少卿賜祭建專祠

李振珽

鄞縣志字詒枋萬厯戊午舉人知保安州厯陞湖廣寶慶知府時寇亂方厲兵寬徭為守

禦計而張獻忠忽以三萬騎薄城下乘城守禦力不能支遂陷振珽被執不屈至衡江奮身投急浪中死弟振珽同時亦被執遇害僕李六鳳周科徐彩亦並死於難

陳良謨

舊浙江通志字賓日鄞人崇禎辛未進士授推官擢御史按蜀時流寇蹂躪楚豫間遂躬

行關隘飭文武為勦禦計甲申闖賊陷京師良謨書絕命詞於壁其僕勸之曰太夫人在堂主人又未有嗣何遽爾耶良謨不為動令一姬先自盡手書一辭母一辭屬承桃者遂冠服自縊

國朝賜謚恭潔命有司

立祠歲時祀焉

謝于宣

鄞縣志字宣子崇禎癸未進士授行人嘗感憤時事題詩邸壁云聖朝自切衣初戒臣子

曾無戶牖謀闖賊破京師于宣慟哭投繯為僕從所解遂被執不屈以死

王恆言

慈谿縣志字仍默崇禎庚午舉人授館陶縣教諭以文行訓迪多士陞滎陽縣令清賦賑

荒惠政決於通邑流寇逼境恆言露宿城頭竭履固守勢孤援絕城陷脅降不屈死

趙珽

慈谿縣志字禹珽崇禎戊辰進士授南安令補侯官再調信宜俱有能聲擢工部主事歷營繕

司郎中陞河間兵備僉事死事贈大理寺卿

應時盛

寧波府志字泰宇慈谿人其先以功封廣寧衛指揮同知遂家焉時盛由諸生襲職蔡懋

德巡撫山西時盛以世胄良將調鎮太原用平五臺交山功陞河南總兵官將行會督師孫傳庭戰

敗潼關山西震動晉王及懋德固留時盛遂不行
崇禎甲申闖圍太原時盛迎戰殺賊數千又以奇
計夜縋死士入賊營令自相擊殺斬級無算生擒
賊首四人平明梟示城樓賊氣懾而標將張雄素
與賊通為內應夜從東南角樓發火賊乘勢登城
時時盛急馳至大南城授懋德劍擁之上馬而身
與賊巷戰賊稍退懋德仗劍立衢中時盛下馬
扶至三立祠相與懷印從容東向拜畢時盛解袍
帶二繫梁左右懋德就左縊身輕不死時盛卸所
衣鐵鎧被其身懋德死乃就右縊須臾氣絕把總
王永魁
等自殺

黃嘉寯

舊浙江通志字仲顓鄞人崇禎中由恩貢知
開州奸民有欲報其父讐者乘流寇之亂引

土苗千餘假道開州嘉寯閉城拒之援兵無一至
者城遂破賊迫之去嘉寯罵賊不屈觸階而死子

近衮近床
俱殉焉

姚誠

舊浙江通志字孝威慈谿人授中城兵馬司吏目闖賊犯闕整冠束帶自縊妻袁氏抱屍慟哭

與十三歲子逢元同
縊一老僕亦死之

戴國柱

慈谿縣志字殿材善騎射遊京師授徐鳳守備累功至參將會小袁營賊起闕大熾國柱

分布方畧大殲厥醜捷聞陟總兵官經理河南山東一帶地方闖犯中州國柱提兵直抵賊壘賊漆生力孩兒軍孩兒軍者闖營中惡少年閔不畏死者也國柱血戰不支遂被害

陳值

慈谿縣志字行之以將才獻策西臺拔第一中崇禎辛未武進士以武備久弛體統久失條上

八議皆允行授白石守備白石為紫荆關要地凡南北貨物悉從守備官稽察歲上稅銀千餘後增

至數千值至詳請革除有狼白晝噬人值以文禱於神惠遂息尋陞都司轉真定標左選鋒營游擊將軍汴中流寇披猖周藩危急請師值奉檄即行斬獲過半遷天津副總兵與黃瑩共領水師陷陣死而

婁文煥

象山縣志字象明縣學生世居昌國衛開明亡痛哭具衣冠徧別親族遂拱坐海邊沙土

上潮至隨水湧去越數日屍復隨潮而轉顏色不變人驚神異

沈履祥

寧波府志字其旋慈谿人崇禎丁丑進士授侯官知縣以循良稱補甌寧明亡棄官入台

州山中兵至死之兄毅祥往求其屍踰月始抵台時盛暑袴皆糜爛獨履祥面如生從兄宸荃字友蓀崇禎庚辰進士授行人擢御史連疏論時政得失不得行其志明亡蹈海死

國朝

王顯謨

慈谿縣志字裕如隸籍天津由拔貢授河南歸德府推官讞獄明允陞福建漳州府同知

順治九年鄭寇竊發督臣以顯謨威望素著令率軍禦之與賊鬪力盡赴水死事

聞贈福建按察司副使
賜祭葬子元翰以廕授武清縣丞

陳貞

鄞縣志字吉人授江西上饒縣丞值閩變寇及廣信貞抗不從逆奔南昌受平寇大將軍委知廣昌縣暫駐南豐會賊衆攻陷力屈被執囚於福州後絞於市事

聞贈江西按察司僉事
賜祭葬廕子入國學

王天才

象山縣志鄞縣人由行伍為象協右營千總康熙十三年與耿賊戰於毛頭洋奮身前進

手刃十七人後賊舟聚圍自己至中矢盡力竭猶
持短兵接戰終不能支遂墮海死

賜祭葬廕子

朝佐

謝逢

象山縣志字于荆恩貢生以教習考授知縣歸
里康熙十四年耿逆寇象山副將羅萬里叛降

逢被執不屈賊擁至
彭姥嶺乘間觸石死

翁鳳翥

西江志鄞人任石門巡檢康熙十五年耿逆
陷城殉難事

聞贈經歷司

經歷

紹興府

三國吳

董襲

三國志本傳字元代餘姚人孫策入郡署門下賊曹遣陽武都尉策薨權年少鄱陽賊彭虎等

數萬人襲分討旬日盡平拜威越校尉遷偏將軍建安十三年權討黃祖祖橫兩艦衝扶守沔口以拑間大紕繫石為礮上有千人以弩交射飛矢雨下軍不得前襲與凌統各將敢死百人兩被兩鎧乘大舸突入艦衝裏襲以刀斷紕艦衝乃橫流兵遂進祖開門走追斬之曹操出濡須襲督五樓船住濡須口夜卒暴風船傾左右乞襲出襲曰受將軍令在此備賊何去也義有死耳其夜船敗襲死權改服臨殯供給甚厚

虞忠

三國志虞翻傳注翻第五子字世芳貞固幹事好識人物晉征吳忠與陸晏晏弟中夏督景堅

守不下城潰被害

鍾離徇

三國志鍾離牧傳注字子幹山陰人牧之子拜偏將軍戍西陵與監軍使者康盛論地形

勢謂宜城信陵為建平援若不先城敵將先入盛不然徇計後晉果遣將修信陵城及晉軍平吳徇

領水軍督臨陣戰死

賀邵

三國志本傳字興伯山陰人孫休即位為散騎中常侍出為吳郡太守孫皓時入為左典軍遷

中書令領太子太傅皓兇暴驕矜政事日敝邵上疏諫皓深恨之邵奉公貞正親近所憚乃共譖邵謗毀國事被詰責後邵中惡風口不能言去職皓疑其托疾收付酒藏掠拷于所竟見殺

晉

謝琰

晉書謝安傳安子琰字瑗度累官散騎常侍侍中苻堅之役安以琰有軍國才用出為輔國將

軍以精兵八千與從兄元俱陷陣破堅以勲封望
蔡公孫恩作亂加督吳興義興二郡軍事討恩恩
逃於海島後恩復寇浹口入餘杭上虞進及邢浦
琰遣參軍劉瑄之拒破恩既而上黨太守張虔願
戰敗羣賊銳進琰跨馬而出廣武將軍桓寶為前
鋒摧鋒陷陣殺賊甚多而塘路迤狹琰軍魚貫而
前賊於艦中旁射之前後斷絕琰至千秋亭敗績
琰帳下都督張猛於後斫琰馬琰墮地與二子肇
峻俱被害寶亦死之後劉裕左里之捷生擒猛送
琰小子混混剖肝生食之詔以琰父子殞於君親
忠孝萃於一門贈琰
常侍司空謚忠肅

張茂

晉書本傳字偉康會稽人少單貧有志行為鄉
里所敬信起義兵討賊陳斌一郡用全元帝辟

為掾屬遷太子右衛出補吳興內史沈亮之反茂
與三子並遇害茂弟盎為周札將軍亮討札盎又

死之贈
茂太僕

謝邈

晉書本傳字茂叔父鍼永嘉太守邈性剛鯁頗有理識累遷侍中時孝武帝觴樂之後多賜侍臣文詔辭義有不雅者邈輒焚之論者以此多邈後為吳興太守孫恩之亂為賊胡桀郗驃等所執逼令北面邈厲聲曰我不得罪天子何北面之有遂遇害

南北朝

張嶠

梁書本傳字四山鎮北將軍稷之子起家祕書郎累遷吳興太守侯景圍京城嶠遣弟伊率郡兵赴援及城陷御史中丞沈沒東歸勸嶠起義於是收集士卒繕築城壘郢陵王至錢唐遺板授嶠征東將軍加秩中二千石賊行臺劉仁茂破義興遣使說嶠曰若早降附當還以郡復加爵賞嶠命

斬其使仍遣軍逆擊之破仁茂侯景聞遣軍助仁茂岷拒戰敗賊臨之以刃終不屈乃執岷以送景景刑之於都市子弟同遇害者十餘人賊平世祖追贈侍中中衛將軍開府儀同三司謚忠貞

王琳

南史本傳字子珩會稽山陰人本兵家少好武遂為將帥以軍功封建寧縣侯景據郢州琳

攻克之又隨王僧辯破景拜湘州刺史元帝為魏園逼徵琳赴援師次長沙知魏平江陵已立梁王

啓乃為元帝舉哀三軍縞素傳檄諸方為進取計陳武帝既殺王僧辯推立敬帝以侍中空徵琳

不從乃大營樓艦將圖義舉陳武帝遣將侯安都周文育等討琳琳逆戰於沌口禽安都文育琳巡

軍而言曰可以為勤王之師矣初魏克江陵之時永嘉王莊甫七歲逃匿人家後琳迎還湘中衛送

東下及敬帝立出質於齊請納莊為梁主齊文宣遣兵援送仍遣兼中書令李駒驗冊拜琳為梁丞

相都督中外諸軍錄尚書事琳乃遣兄子叔寶率所部十州刺史子弟奉莊纂梁祚於郢州莊授琳侍中使持節大將軍中書監改封安成郡公及陳文帝立琳乃輔莊次於濡頰口齊遣揚州道行臺慕容儼率衆臨江為其聲援陳遣安州刺史吳明徽將襲益城琳遣已陵太守任忠大敗之明徽僅以身免琳兵因東下陳遣太尉侯瑱司空侯安都等拒之瑱等以琳軍方盛入蕪湖避之時西南風至急琳謂得天道將直取揚州侯瑱等出蕪湖躡其後比及兵交風反為瑱用琳船艦潰亂兵士為陳軍所殺殆盡琳尋與莊同入齊齊乃除琳驃騎大將軍開府儀同三司揚州刺史封會稽郡公會陳將吳明徹寇齊齊帝敕領軍將軍尉破胡等出援秦州令琳共為經畧謂破胡曰吳兵甚銳宜長策制之慎勿輕鬪破胡不從軍大敗琳單馬突圍僅獲免還至彭城明徹進兵圍之堰淝水灌城水

氣轉侵人皆患腫死病相枕城陷被執百姓泣而從之明徹恐其為變殺之哭者聲如雷有一叟以酒脯來號酌盡哀收其血懷之而去傳首建康懸之於市琳故史梁驃騎府參軍朱瑒致書陳尚書僕射徐陵求琳首明徹啓陳主許之持其首還淮南權瘞八公山側會葬者數千人尋有揚州人茅智勝等五人密送喪柩達於建業贈十五州諸軍事揚州刺史侍中特進開府錄尚書事諡忠武王琳第十七子長子敬在齊襲王爵武平末通直常侍第九子衍隋開皇中開府儀同三司

張彪

南史本傳少在若耶山為盜臨城公大連出牧東揚州彪率所領客馬為中兵參軍及侯景將

宋子仙攻下東揚州還入若耶舉義征子仙不捷仍走向剡貞陽侯踐位為東揚州刺史剡令王懷之不從彪自征之留長史謝岐居守時陳文帝已據震澤將及會稽彪乃遣沈泰吳寶真還州助岐

保城彪後至泰等反與岐導陳文帝入城彪因其未定踰城而入文帝走出彪復城守彪將申進密與泰相知因叛彪彪復敗走不敢還城據城之西山與弟崑崙妻楊氏數人追隨所養犬名黃倉在彪前後未曾捨離乃還入若耶山中沈泰說陳文帝遣章昭達領兵重購之并圖其妻彪眠未覺黃倉驚吠劫來便啣一人中喉即死彪映火識之曰須我者但可取頭誓不生見陳椿呼妻與訣生死從此別若見沈泰申進為語曰功名未立猶望鬼道相逢劫遂後彪并弟致二首於昭達黃倉號叫彪屍側宛轉血中昭達迎彪妻便拜楊割髮毀面誓不更行投於火彪始於若耶興於若耶終於若耶及妻犬皆為時重異

隋

虞熙

隋書虞世基傳世基子熙餘姚人大業末為符璽郎弟柔晦並宣義郎化及將亂之夕宗人虞

叡知而告熙曰事勢已然吾將濟鄉南渡且得免禍同死何益熙曰棄父背君求生何地感尊之懷自此訣矣及難作兄弟競請先死行刑人於是先世基殺之

宋

石待舉

成化新昌縣志字寶臣天聖五年進士補沂州軍推官會河陝用兵除通判保州先是州

有雲翼軍數千人俱隸沿邊巡警皆精銳驍勇故廩給特優治平間復領以中貴人訓練無法驍蹇日甚邊郡患之待舉條奏乞均廩食且以武臣領之驍卒往往怨語中貴人罷去武臣俞貴代之貴怙寵恃勇憾奪已之權與中貴人及卒之怨者日以言激之故逆卒乘間鼓譟劫庫兵為亂待舉聞

難徒步率州兵數百人討賊轉鬪
於市賊鋒銳不可敵兵潰遇害

董公健

萬厯紹興府志字伯強新昌人宣和庚子方臘起桐廬蔓延新昌官吏奔竄公健慷慨率

子弟聚里中萬人馭以紀律遂破賊焚其寨斬首
千級境內復安王師討剡西賊檄公健為先鋒公
健藉累勝之威以數百當數千殺獲頗眾已乃王
師不進勢孤援絕公健度事不可為呼眾語曰大
丈夫寧以義死不可以不義生遂自殺
贈武功大夫汝州團練使官其諸子

張宇發

嘉泰會稽志字叔光會稽人舉進士調含山
主簿靖康初以李綱薦召對除都官員外郎

金人再犯闕詭執和議要大臣宣諭兩河中書侍
郎陳過庭請行宇發為副拜徽猷閣待制已而分
過庭往河北宇發往河東會金情中變鑿駕北狩
兩人皆以銜命在道遂繫留異域聲問俱絕紹興

十三年前禮部尚書洪皓還朝言宇發沒於雲中見其櫬旅寄荒寺攜至燕山授僕人徐禹功使葬焉因疏請褒贈時相秦檜阻抑事不果行檜死皓子翰林學士遵言宇發執節歿身於是詔贈左朝

請大夫官

其子孫

陳過庭

宋史本傳字窟玉山陰人中進士第除國子博士擢吏部員外郎使契丹歸勸帝以邊備

為念歷遷御史中丞兼侍讀睦寇竊發過庭言致寇者蔡京養寇者王黼竄二人則寇自平又朱勔父子本州餘小人交結權近竊取名器宜昭正典刑由是大與權貴迂罷知蘄州謫海州團練副使黃州安置欽宗立除中丞辨宣仁后誣謗姚古擁兵不援太原陳其可斬之罪七擢右丞中書侍郎議遣大臣使金朕南仲以老聶昌以親辭過庭曰主憂臣辱願効死帝為揮涕嘆息及城陷過庭護

帝北遷因留不得還卒於燕山贈開府儀同三司諡忠肅

於琳

兩浙名賢錄蕭山人為本州防城保甲建炎初陳通叛琳從浙東安撫討賊戰敗被執賊欲刺

面強降之琳罵不屈賊眾攢射矢著如蝟罵不絕口死之

豐治

萬歷上虞縣志禮部尚書清敏稷之孫建炎中高宗駐蹕淮揚金人入境時治監轉般倉死之

紹興十一年詔褒其忠錄子誼為將仕郎

唐琦

宋史本傳臨安本衛人建炎間高宗航海琦病留越州李鄴以城降金人巴哩巴守之琦袖石伏

道傍伺其出擊之不中被執巴哩巴詰之琦曰欲碎爾首死為趙氏鬼耳巴哩巴曰使人人如此趙氏豈至是哉又問李鄴為帥尚以城降汝何人敢爾琦曰鄴為臣不忠吾恨不得手刃之乃顧鄴曰我月

給才石五斗米不肯背其主爾享國厚恩乃若此
豈復齒人類哉詎罵不少屈巴哩巴趣殺之至死不
絕口事聞詔為
立廟賜名旌忠

龔生

萬應紹興府志上虞人慷慨有志畧建炎中金
兵渡浙江次上虞所至焚掠民皆竄山谷生獨

奮臂諭其里人曰敵將屠吾邑吾屬雖力不敵有
死不可去遂募民之果勇者得數百人迎縣令丞
依險自固分署隊伍整兵環向以待之敵至出其
不意驅眾先登嶺嶠投石擊之斬其將殺傷甚眾
生亦
戰死

張愁

兩浙名賢錄一名景說字欽甫嵊人紹定四年
為定城縣尉攝麻城縣事適敵攻破沙窩關深

入麻城兵不支被執脅使降愁曰吾氣吞若曹
顧力屈耳豈從汝耶遂遇害事聞贈通直郎

趙良坡

萬歷上虞縣志字深甫坦兄淳熙乙丑進士守禦廣州為元兵生獲欲降之不屈元將義

之放歸踰年元將思其賢復索而得之欲薦於朝良坡終不屈怒目詈罵元將令左右刃之良坡大呼曰我得死所矣遂伸頸受戮其子友直同榜進士聞難泣血冒刃歸櫬葬西溪湖眠牛山所居有視清亭戒子孫弗仕元

趙良坦

萬歷紹興府志字平甫良坡弟寶祐二年進士知永嘉瑞安福清並以廉介名會吉廣二

王走閩中檄良坦以軍器監簿贊軍事於是募兵守禦元兵南指力屈就擒脅降不屈繫獄中二年作書付其家曰試令三載無愧於心守節二年不屈於敵只因忠義二字累及老稚一門今惟死而已後元帥詰其不屈狀對曰生為宋臣死為宋鬼遂欣然就刑

豐存芳

兩浙名賢錄字公茂稷元孫為太平縣倅景定元年元兵至知州孟知縉謀以城降存芳

諫不聽詈之知縉遂引元兵屠其家同死者十八人卒方義竊其孤八歲禮長於民間傳至曾孫淳

甫洪武中以賢良薦仕至監察御史

唐震

宋史陳元桂傳震字景實會稽人登第歷浙西提刑嘗忤賈似道免官咸淳十年起知饒州元

兵至震發州民城守元兵使人入饒取降款通判萬道同諷震降震叱之曰我忍偷生負國耶城中

少年感震言殺使者明年元兵大至震出府中金錢募能戰者眾懼不能遂潰震入府中王芝堂有

頃兵入執牘鋪案上使震署降震擲筆於地不屈死之兄椿與家人俱死震贈文華閣待制謚忠介

廟號褒忠官其二子

何雲

萬歷紹興府志字仕龍諸暨縣人德祐間北兵至傾貲倡義築柵率鄉人抵禦不支與其子嵩

並死於難

吳觀

陳非熊

兩浙名賢錄觀字叔大新昌人嘗為稽山書院山長元兵入浙東恭帝北

輒檄報與邑人陳非熊協謀奉宋宗室趙節使圖恢復集義勇千餘繕城固守力戰死非熊弟羅彪虎子圭壘姪璠坑數十輩皆被害惟子璵留新昌獲免痛父死難屏居讀書後至元十四年婺寇掠新昌邀擊陳宣慰璵率宗人赴援聞宣慰被殺憤激決戰皆歿於敗兵嶺可謂世濟忠烈云

朱光

萬歷紹興府志字吉父諸暨人元巴延下江南遣裨將上官棊招撫浙東至縣光與同邑張軫

等率鄉民抵禦光被執口占曰生為大宋臣死為大宋鬼一片忠義心明月照秋水賊怒以火然之

三日始絕軫亦不屈而死
光嘗註西銘人多諷誦之

趙孟松

宋史劉士昭傳元兵駐紹興福王與芮從子
曰孟松謀舉兵事泄被執至臨安范文虎詰

其謀逆孟松詬曰賊臣負國厚恩共危社稷我帝
室之胄欲一刷宗廟之恥乃更以為逆乎文虎怒

驅出斬之
雷電晝晦

曾塤

江西通志紹興人開慶己未為瑞州錄事參軍
以州命行各縣賑饑民值元兵至被擒圭帥聞

其名誘之以利不從且詈之
遂死事聞贈秩官其一子

余廷簡

於越新編餘姚人咸淳進士
任溧水丞元兵至不屈死之

元

董旭

萬歷紹興府志新昌人公健之後少負英氣博通羣書與台哈布哈最友善台哈欲興師討方

國珍臺臣怨其不稟命殺之旭遂歸隱山中已而國珍據台慶欲羅致幕下旭拒不受乃作詩曰鬱鬱芒碭雲未辨蛟龍形熒熒祥星光未燭夾馬營君子慎其微草露不可行國珍強之終不屈遂遇害

顧生

徐一夔顧君墓誌上虞人少負奇氣見義勇為及壯有設施為鄉里所倚重時邊境驛騷方氏

據有温台鄞三郡且遣偏將侵餘姚上虞二邑而行樞密院判達實特穆爾猶為元守越城兩兵相接生團結鄉兵以應里有邵某者素強暴嘗聚羣不逞剽掠鄉里生用所團結兵殄之其人竄去為方氏向導生復與戰於曹城江上眾寡不敵遂遇害

胡善

輟耕錄一名存道字師善諸暨人至正乙未為松江儒學苗寇至欲毀孔子廟善坐經席罵寇

寇怒殺之而廟得免於災先是善題詩於壁曰領檄來司教臨危要致身及死果不誣後教官貌其

像祀於先賢堂

明

王綱

分省人物考字德常餘姚人洪武初以文學徵拜兵部郎中潮民弗靖擢廣東參議往督兵餉

致書與家人訣攜子彥達俱往諭降之還至增城為海寇曹真所得為壇坐綱上羅拜脅為謀主綱罵之遂遇害彥達請代不得且哭且罵曰并殺我其長曰父忠而子孝殺之不祥釋之乃綴羊革裹綱屍以歸後立廟死所彥達子與準閉門力學不求聞達有司以遺逸薦逃匿山中

黃里

弘治紹興府志字德鄰山陰人幼從王冕遊通春秋尤工於詩洪武四年舉明經授雲南州同

知七年邊寇突入欲奪其印執弗與遂遇害弟亨聞之率衆百餘與戰賊敵不支皆潰去亨亦傷左

目幾死抱里骨萬里歸葬忠義萃於一門

董曾

萬曆紹興府志字貫道新昌人旭之弟師潘嘉通經史善古文元末不求仕進方國珍欲官之

不受避居東陽山中太祖駐蹕金華以禮招致曾往見授知無為州遇陳友諒寇城被執不屈死有

詩集天堯山賦行世

蔣文旭

諸暨縣志字公旦洪武初由貢入大興薦舉拜河南道御史與方孝孺友善陳時政十二

事以易儲忤旨賜死於邱文旭北面拜曰苟有裨於國臣敢偷生上尋悟赦至已無及矣

陳性善

嘉靖浙江通志名復初以字行山陰人洪武丁丑進士授行人司副遷翰林院檢討動止

安雅書法精妍上嘉悅之超拜禮部左侍郎皇太孫在東宮時已聞性善名及即位召問以治道多見信用靖難師起命監李景隆軍敗於白溝河與同事者被執悉縱遣之性善獨朝服躍馬入河以死

宋味古

名山藏會稽民能詩建文亡味古夜從星月下壘牀北向拜祭已慟哭如是者月餘為讐

家所告遂逮捕其子某請代乃得釋

殷旦

萬應紹興府志蕭山人永樂初進士為監察御史敢言錦衣衛都指揮紀綱怙寵奢僭旦劾其

奸惡數十事綱遂棄市自是貴倖斂戢當時有殷旦入朝百官失色之語拜交趾按察副使黎利叛

安南復沒於交趾悉逐朝廷命吏易以所親獨留
旦欲用之旦不屈自經死交人義之具棺衾送其
妻出
界上

陳士淵

閩書紹興人永樂間巡檢邑民吳十師寇德
化諸縣士淵與耆父葉文慎等率衆捕之十

師就戮餘黨復起
勢張甚力戰死之

謝澤

萬厝會稽縣志上虞人永樂戊戌進士授刑部
主事累遷廣西右參政佐柳侯征夷招撫全活

者以萬計擢通政司正統十四年鑿與北狩命提
督居庸白洋等關敵勢猖獗力不能支或請移軍
別屯澤厲聲曰吾受朝廷厚恩三十年此豈偷生
日耶率衆當敵而死其僮由吉抱澤屍匿亂屍中
始得歸詔賜葬祭錄用其子儼大理評事
曾孫元順正德丁丑進士官刑部侍郎

龔安全

弘治給興府志字希寧其先蘭谿人從父可平戊紹興遂為郡學生永樂甲辰進士授工

科給事中歷陞左通政使正統十四年扈蹕北征沒於王事景泰元年贈嘉議大夫通政使錄其子

廷輝為刑部照磨

毛吉

湯斌毛吉傳字宗吉餘姚人景泰甲戌進士授刑部廣東司主事故事十三司分理在京刑獄

而廣東司當治錦衣衛卒衛卒天子親軍主陰刺百司事故號橫是時掌衛事門達尤縱惡雖大臣稍失意輒搆以重法以故卒有犯下司悉好遣之莫敢問至吉獨法治不少貸卒大憾庫署吉曰毛葛刺云吉嘗過門達西街諸官引馬避去吉獨於馬上舉鞭抗揖過達愕然顧左右曰誰也左右曰是所謂毛葛刺者也達怒百計求吉過會吉以病誤朝參下衛衛卒走白達曰毛葛刺至矣掄巨杖

杖之骨見幾死既而復職即繩錦衣卒如故稍進
至郎中遷廣東按察司僉事分巡潮惠二府黜墨
吏除奸宄為民患者民大悅成化元年賊寇翁源
吉率官軍兼程進斬獲百餘級賊西奔既而新會
告急吉率都指揮焦用指揮閻華孫壁與戰賊敗
走乘勢追至雲岫山去賊營十里而舍分兵三道
期雞鳴蓐食進擊會夜晦失期賊覺走伏營後軍
士入空營賊擁眾馳下官軍大亂閻華馬蹶見殺
眾皆潰吉仗劍大呼遮之不能止從吏廖振白吉
避去吉叱之且殿且戰賊合力趨吉吉猶斬數人
刃折遂遇害贈通議大夫廣東按察使

韓銑 萬厯上虞縣志字日章成化丙子舉人出守荆
門州陞韶州府同知雷道委征連山等若賊勢

獨振竭力行間遂遇害
詔贈知府錄子入監

孫燧

紹興府志字德成餘姚人弘治癸丑進士自刑部郎歷藩臬並以廉幹著聲宸濠逆謀日露朝

議選才節大臣摧其機牙擢副都御史巡撫江西燧聞命歎曰是投艱於我生死以之乃遣妻子還鄉止攜二家僮赴任入南昌人情方洶洶諸奸黨內外盤結燧密為牽制計首城進賢又城南康城瑞州請復饒撫兵備又請救湖東道分巡兼理兵備與饒相犄角九江當湖衝最要害請重兵備權兼攝諸州郡便控制廣信橫峯青山諸窰地僻人悍請設通判駐弋陽兼統六縣恐濠起掠兵器假討賊盡出之他郡密疏白宸濠必反章七上輒為濠黨邀匿不得達積憂勞數月鬣髮盡白會御史蕭淮發濠反狀朝廷遣重臣即訊濠懼將舉兵會生辰宴官屬明日入謝濠匿兵幕中出立露臺宣言曰太后密旨詔我監國眾相顧愕始燧直前曰安得此言果有詔請出示之濠曰不必多言我往

南京汝當保駕燧張目厲聲曰天無二日我豈從汝反者濠怒却入殿中易戎服出幕中兵皆出露刃環立濠大呼罵曰我何負於汝汝奏我七本燧曰朝廷何負於汝汝反耶濠喝武士縛燧燧奮臂起縛者持銅錘擊折燧臂一時官屬咸股栗不敢出聲獨副使許達爭白巡撫天子大臣汝曹安得無禮因以身翼燧遂并縛達曳出惠民門外同遇害時日方烈忽陰霾黯慘狂風驟起數日居民無大小皆流涕走收兩人屍蠅蚋無敢近者嘉靖元年贈禮部尚書謚忠烈立祠祀南昌錄其子堪世襲錦衣千戶

郁采

萬厯紹興府志字亮之山陰人正德戊辰進士授刑部主事不能阿順取容謫大名教授稍遷

裕州同知流賊起河北殘破州縣勢甚熾采身率裕人繕城以待賊至裕守欲棄城走采曰無為民

望乃身先登陴矢石四下賊避城而營則又遣人
潛俘其醜手刃之灑淚以激州人州人感泣人人
願效死賊稍引去采計其必復來益練兵為備以
妻女托其友莊士儁訣曰脫賊再至采必死所欲
以家累累君者恐重傷老母心也已而賊果至守
益怖欲走采曰毋恐內南城塹河也寇難近屬公
東北平淺易破有采在賊攻東郭不克守開西門
潛遁去賊乘之入采還救巷戰被執罵不休賊裂
其口輔殘其體而死賊據裕三旬乃退莊率其家
人於亂屍中辨其骸而斂之事聞詔贈光祿寺少

卿陰一
子八監

沈鍊

徐渭沈鍊傳字純甫會稽人嘉靖戊戌進士知
溧陽擢錦衣衛經歷庚戌寇入古北口時集羣

議於廷率姘姘不敢出一語鍊歷階抵掌慷慨論
時事嚴氏黨執格之遂抗聲詆嚴氏父子又上疏

請兵萬人欲出良渚以西護陵寢不報又上疏直
詆嚴氏十罪有詔廷杖五十削官徙保安為民是
時邊人苦殘掠而楊順者方握符鎮宣大割漢級
以寇首冒功鍊飛札入轅門數順罪順忌之承嚴
氏旨日夜搆鍊鍊在邊募土人為城守保安饑又
市粟施粥僧舍活萬餘人順謂諸事非放逐臣所
宜遂與御史巡宣大者路楷會疏入告鍊叛狀嚴
父子從中下其事竟棄市連坐死者五人又捕其
長子襄械抵宣府杖繫幾死會給事中吳時來疏
上有詔速順楷襄得免詔贈鍊光祿少卿廕一子
沈束分省人物考字宗安會稽人嘉靖癸卯鄉薦第
一甲辰成進士司理徽郡拜給事中會總兵周
尚文卒請卹典嚴氏憾其素不附己報寢束抗疏
言尚文忠勇素著其死也邊人無不灑涕身後之
典格而不議何以示勸疏入嵩大恚條旨杖闕下
尋繫詔獄垂絕者三四庚戌寇入犯闕京師戒嚴

詔集廷議國子司業趙貞吉抗言曰釋沈束之囚以求直言錄周尚文之功以勵邊將敵可不戰而退束在獄聞變請得精兵五千往來督戰以翼都城且度寇飽而歸必道涿鹿出遼薊或衝突於宣大傳檄諸路乘其惰歸設兵夾擊必大勝焉見疏曰囚安得與朝議屬加械手足賴徐階申救得免後嚴氏敗詔釋放還在獄所著周易通解文言說內外歸里著易圖洪範律呂諸說詩春秋周禮諸解及潮候集雜體詩稿

謝志望

胡夢雷

金應暘

萬歷紹興府志志望國子生夢雷庠生並餘姚

人應暘山陰人賊自海上蔓延姚岬志望等與知事何常明分道率鄉兵禦之倉卒遇賊於四明之中嶺及三界五婆嶺諸所頗有斬獲後竟以矢盡力竭並遇害事聞詔贈常明志望太僕寺丞夢雷

應陽州

同知

姚長子

兩浙名賢錄會稽人嘉靖乙卯倭自諸暨突入郡境獲長子貫其肘使為導長子乃給之

西而密語鄉人曰俟我過某橋若等亟撤之我引賊入絕地可悉就擒我死不恨已而果陷於化人壇四面皆水我兵截其後賊知為所給殺長子劉其屍賊百三十餘人盡殲於此鄉人立祠祀長子於元所

祝國泰

廣東通志餘姚人武進士管潤州中軍萬曆三十六年海寇掠欽州至龍門國泰領兵衝

之殺賊百計賊益眾來圍或以眾寡為言國泰厲聲曰龍門乃欽之咽喉萬一有失不重誤欽人乎寧死無退迎敵奮戰會潮淺船膠遂遇害剖腹焚屍潤州游擊張某立廟祀之

彭應時

萬曆紹興府志山陰人。中武科。為鎮撫。被黜。久之。都御史王忬鎮浙。知其才。檄使練士。會

參將盧鏜自松江擊走蕭顯忬。令應時截諸海塘。乍浦為賊所掩。乃奮鬪。被創墮馬死。

丁乾學

舊浙江通志。字天行。號自菴。山陰人。萬曆己未。進士。授庶常。尋以檢討充經筵講官。甲子

典試江西。稱得人。時魏忠賢竊柄。乾學抗疏糾參。罹禍。閣臣疏救。降級調外。忠賢銜恨。指其試策謗。訛時政。既削職。復矯稱駕帖。差緹騎逮訊。乾學辨論侃侃。被拷掠。尋斃。崇禎初。贈禮部尚書。謚文忠。廕一子。所著有擁膝齋文集行世。

陸夢龍

舊浙江通志。字君啓。山陰人。萬曆庚戌。進士。授刑部主事。出為九江道。調黔中。累有戰功。

粵帥附魏璫。為建祠。立碑。潛列其名。亟令剷之。厯究東固原道。時流寇自豫入秦。犯固原。擊之。去。入

犯秦州馳救之人。人靜寧州以兵堵勦及陷隆德。隆德本非所轄。夢龍率賀奇勲石崇德等禦敵。偵者妄傳賊不滿千而猝遇數萬於老虎溝。計兵僅三百人方欲倚山為勢以待援賊。矢石如雨不可支。賀石兩將抱之泣。夢龍曰何作婦孺態。大呼而出。手刃數賊。賊併力夾攻。遂與賀石俱遇害。贈太僕寺卿。謚忠烈。

單國祚

雲南通志。會稽人。崇禎末任通海縣典史。管本縣驛務。值沙逆兵破縣城。國祚坐堂上持印罵賊被殺。既死。篆猶在手。握拳不開。縣人葬於諸葛山下。

黃尊素

紹興府志。字真長。餘姚人。萬曆丙辰進士。授寧國府推官。人為山東道御史。時朝臣鄉元標。劉宗周相繼去位。力請召還。以襄國是京師地。震尊素上言。魏忠賢客氏亂政。實致天變。有旨廷

杖閣臣韓爌力救得免及楊漣劾魏闡尊素言小
人為惡初猶畏主知畏人言至於形見勢窮復何
顧忌今臺諫折之不足後恐干戈取之亦難為力
矣部郎萬燦杖死尊素又言他日有東董史之筆
者書某月某日部臣某以言事死可不為聖明之
累哉忠賢惡之削籍去又明年闡人李實以講學
劾之被逮而縱騎為吳人箠死尊素問道投獄與
同難諸公講道云破得生死關方是喻義實際闡
使許顯純誣賊拷掠尊素拷竟次及李應昇尊素
復就拷顯純詰之尊素曰吾忍見李公負病受楚
毒乎顯純為之動容被害時北向再拜謝君南向
再拜謝父母賦詩一章畢命後闡伏誅贈太僕寺

卿謚
忠端

王禹佐

嵯縣志字之益天啓元年領恩薦銓考第一
除判保定駐居庸關司昌平三區屯漕敘功

加級署懷柔凡城守濠柵火器無不畢備移鎮昌
平烽火告急登陴固守督撫連檄調回關禹佐曰
關有重兵而昌無守備我為其易誰當其難羽書
再至不受內變突起遂嬰城不屈死子國宣同殉
事聞賜祭
葬謚忠襄

張名世

紹興府志字今我山陰人萬曆乙未武進士
授雲南都司苗長阿菀擁兵陷武定府之一

州三縣名世擊之盡復其地忌者謂其多獲金寶
思重賂不得因誣為冒功入刑部獄督師特疏出
之期以北邊立功時邊帥擁重兵者乘間遁歸名
世曰吾受國恩不能報國何用生為遂戰死陣中
贈中軍府都
督蔭一子

施邦曜

浙江通志字爾韜餘姚人萬曆己未進士
授工部主事遷屯田司郎中閩人涂文輔監

督二部邦曜恥屈其下請降俸出知漳州李魁奇
亂或請撫之邦曜曰苟如是又為閩疆一蠹也從
巡撫鄒維璉悉力定之劉香橫海外乃繫其母且
錄其徒眾使誘之香卒授首入為通政使尋罷職
再召為南京通政使陞辭言事當上意出都三日
即遣中使召還擢左副都御史流寇逼京畿邦曜
請飛檄勤王當事者泄泄邦曜憤切怒罵未幾京
師陷邦曜在東長安門望門投繯居人揮之出以
砒霜投燒酒飲之流血而死

國朝

追謚忠愍

劉宗周

儒林傳詳

周崇禮

金光宸周崇禮傳字敬生山陰人任滎陽縣
典史崇禎八年正月流賊入境知縣楊節赴

首眾欲開城走崇禮拔刀勒眾曰城外徧地皆賊
出必死不如從我力守眾唯唯賊攻小西門崇禮

率眾以飛石擲之有傳而登者輒斫死賊稍退復
駕樓車逼城崇禮與眾揮箭石如雨賊傷甚夥又
稍退六日乃佯攻小西門猝用大砲擊南門門破
崇禮急趨南門力戰殺賊無算賊將老回回恨甚
刀斧齊加猶罵不絕口死於南門下是日積屍塞
路大風連晝夜沙土蒙蔽骸不可認崇禮屍特挺

露面如生榮民環擁哭聲震天事
聞諭祭建捐軀報國坊祀名宦

顏日愉

陝西通志字華陽上虞人萬厯舉人令葉縣
多惠政擢知靜寧州羅賊亂馳請固鎮五道

兵而先率敢死士直陷賊營斬首數百五道兵繼
破之遷開封同知尋陞南陽知府賊陷城殉難贈
太僕卿

俞志虞

毛奇齡俞志虞傳字際華新昌人崇禎進士
授四川順慶府推官流寇入成都道經順慶

鄉官請集民堵禦志虞不可曰寇之深入必有
兵追戲之以民迎敵徒棄民耳吾堅守以待正恐
追軍之尾此當不遠也已而果然十五年行取召
對平臺親策安邊弭盜數事條對稱旨授貴州道
御史復上緝盜練兵選將任賢屯田十餘疏遂奉
使巡山海居庸兩關十七年赴都將西出而闕賊
警至吏請行曰官出使則無與他事志虞叱之曰
人臣為王事死而借王事以生乎不行城陷志虞
將自縊其子泣曰未知駕在何所探而後殉未晚
也志虞唯唯然已不食坐露地梓宮出東華門志
虞匍匐往慟夜遂縊於新昌會館衣有紙云吾不
死於院而死於此者吾已在巡且恥院中有此官
也

童維坤

紹興府志字載弘岷人萬厯己未武進士
真定游擊崇禎癸酉勦寇大名府連戰皆捷

赴援趙州追寇至內邱塞地勢漸險寇得所倚監
軍副使盧象昇急令轉戰至摩天嶺出山北迎敵
寇踞山南以高擊下維坤
遂戰死事聞贈都督僉事

金應元

江南通志會稽人萬曆辛酉舉人知太湖縣
崇禎間流寇入潛山應元請兵不至越二日

賊長驅入境應元以死拒守賊執之加刃於項脅
令跪不屈賊怒殺之家人俱罹難贈太僕少卿廕

子一

馬驄

紹興府志字最白會稽人萬曆武舉歷登州府
參將崇禎間兵變圍攻郡城驄堅守一月請援

不至潰圍出戰被創十有六乃被擒不屈死闔
門眷屬並死事聞賜祭廕一子錦衣衛小旗

陳孔教

紹興府志字魯生會稽人萬曆庚子舉人歷
工部郎中崇禎末出為四川僉事方涖任張

獻忠破省城孔教以川南道督
所部守禦旋被執不屈而死

徐國泰

上虞縣志任保安守備崇禎七年城陷闔門
殉難事聞贈參將世襲總旗諭祭倪元璐節

義傳字心湯上虞黎畧人起武試除保安守備保
安地支僻武事不備額戍四百復他調崇禎甲戌
七月敵數萬騎驟薄城國泰急呼居民入保初攻
北砲退之已攻西砲退之復攻東砲大退之火藥
絀乞之州伯閔生斗不應徬徨呼號聲如吞炭遂
大困敵附城蟻上猶率民巷戰扼使不得下敵伏
處城上昧爽始大集國泰知勢不可為驅其妻女
十三人皆入井已乃升屋騰躍赴鬪過壽亭侯祠
見學博馬承國率諸生草降拉國泰俱國泰斥之
遂羣嗾焉乃拔刀自刎左右堅持之遽躍入井中
死事聞于鄉賜節義成雙之楔其入井十三人者
元配薛妾王弟履泰之室趙妾李外母劉暨三女

三婢同時殉難者則參將江騰龍千戶徐文魁署印斬國昌史目王本立節推李師聖

倪元璐

紹興府志字玉汝上虞人年十六舉於鄉天啓壬戌成進士授庶吉士時魏闖竊柄朝臣

多附之元璐介然獨立羣小忌正嫉賢梓有三朝要典混淆是非崇禎改元元璐奏請焚之又疏糾

楊維垣等骨鯁人著歷侍讀學士充日講官陳十六策率言制實制虛所以濟時上揭之御屏頻為

省覽時有忌而劾之者遂罷職壬午流寇日熾起為兵部右侍郎閣臣陳演不欲元璐為本兵言於

上改戶部侍郎見額餉左支右絀日夜持籌朝議欲開採力爭之中使分路出鬻浙直桑榿疏論其

害乃得撤未幾詔元璐仍供詞臣職甲申二月聞寇將犯闕元璐請遣東宮急治金陵宮殿上猶豫

不果召勤王師無至者三月乙巳寇圍京師越三晝夜丁未城陷元璐整冠帶向北謝闕南向謝母

欽定四庫全書

卷一百六十四

出就廳事題紫云死吾分也慎勿棺衾以志吾痛
遂投繯死

國朝賜諡
文正

朱邦聞

山陰縣志山陰人湖廣房縣主簿崇禎十二年賊張獻忠羅汝才攻城城破被執遂遇害

贈鴻臚
寺丞

鄒光祚

山陰縣志山陰人河南商邱縣主簿崇禎十四年闖賊李自成入寇光祚守西門城陷戰

死姪宗道
亦被殺

吳應科

河南通志蕭山人崇禎中任武安典史流寇犯境赴敵死邑人建祠祀之

吳從義

陝西通志字裕強山陰人崇禎庚辰進士授陝西長安令時闖賊自楚入豫軍興旁午從

義悉以己資彌縫其缺又連值饑饉多方賑濟及賊至勢蹶張不能復守從義仰天歎曰國破臣宜死貪生應所羞引刃自刺不死遂投於井賊將引出之輒大罵賊怒推石擊死

章尚綱

陝西通志字闇然會稽人由監生為秦王府左長史崇禎癸未李賊陷城尚綱自縊於端

禮門贈按察司副使予廕賜祭葬建祠

章贊元

紹興府志字素完會稽人由吏員授四川江油縣典史縣治無城崇禎十六年流寇入境

縣尹避入山贊元以禮服坐縣廨家僮促之走乃曰我食君祿守此土何偷生為賊向導至乃縣民也素知贊元廉正不忍害勸使去不從賊大至脅以降不屈遂奔浮橋躍水死民立廟祀之

趙嘉煒

毛奇齡趙嘉煒傳字景思山陰人崇禎十七年仕成都之郫縣郫有粉江可以注錦江而

溉蜀田其堰在灌嘉焯甫受事即以司堰故入
灌而獻賊適至脅之降不屈因射死而沈於江

周鳳翔

舊浙江通志字儀伯號巢軒山陰人崇禎進士選庶吉士授編修轉國子監司業時邊腹

交關兵食兩絀鳳翔謂宜發內帑以收人心不宜
搜括民財以空國計無何寇逼畿甸蜂擁城下鳳
翔聞變號慟援筆為書三一奉父母一寄兩弟一
訓子玉忠遂囑姪國泰曰汝歸善慰我親吾死所
以報親也惟棺用黑勿衣錦藉汝歸吾骨吾目瞑
矣遂沐浴更衣再拜投繯而死其絕命詞有曰碧
血九天依聖主白頭二老泣孤臣所著有代言講
章奏牘詩雜文諸集

國朝

順治九年追卹諭祭贈
禮部左侍郎謚文忠

陳三益

紹興府志字友芝山陰人崇禎間以太學生
授中丞河南旱蝗民飢三益盡發其資為

糜賑之時閩寇滋蔓民聚為盜三益集丁壯築堡立寨以支旦夕題授儀封令仍兼中年甲申寇陷都城偽使者以招撫至同官咸勸出迎三益感憤引刀盡碎所佩印不屈而死

姜道元

紹興府志字敬勝餘姚人以順天副榜授山東布政司理問攝臨清州篆歲旱漕河涸道

元禱之雨隨澍河流大增糧艘得行無何濟南被圍職守北門道元以俸貲募丁壯相與戮力死守數旬城陷被執脅降不從遂見殺妻來氏自沈署後湖中子廷樑從之事聞于褒卹

顧旦

上虞縣志字君輝上虞人授四川永川縣丞崇禎甲申流寇蜂屯旦署篆永川倡義固守誓以

死殉生擒偽將何湛元等城賴以全敘功陞知銅梁縣獻賊攻銅邑旦堅壘數月糧盡援絕城陷被

執不屈死

徐至美

上虞縣志字羽君崇禎甲戌武進士授杭州樞木營大廳守備陞湖廣操捕都司淮任甫

月張獻忠圍武昌至美分守黃鶴樓一帶賊勢猖獗率敢死士晝夜力戰身被重創而死

汪登瑞

餘姚縣志字熙宇由武舉授大同總戎都督僉事屢著戰功值魏忠賢逆箴告致回里甲

申聞變
絕食死

周卜年

毛竒齡周卜年傳字定夫山陰人弱冠通五經子史甲申聞變痛哭狂走數日不進餐作

五絕命歌與弟卜應書緘之潛詣白洋之瀆遇漁者授之曰我安昌周定夫也有蹟我者與之乃疾

馳磯畔兀立潮至躍入卜應聞之號於海濱從漁者得所寄書募網撈之三日不獲忽屍從躍處浮

起顏色如生冠角弗折履鞮未失觀者如市咸驚歎乃殮而厝焉郡人立祠東郭門外渡東橋

趙德遊

公舉事實字公銓上虞人天啓舉人崇禎庚辰任四川東鄉令邑隸夔門為賊淵藪出沒

無寧歲德遊撫洞澈示民忠義殫力守禦賊圍城德遊連發砲弩中賊賊不敢攻潛穴地道入德遊

知事不可為遂投井死家屬殉難者一十七人尉王佐收其骸并獲佩刀衣袂為葬西郊元妙觀側

子振芳後為新都知縣奔奉骸骨歸後陞建寧府同知

祁彪佳

舊浙江通志字世培山陰人天啓壬戌進士以司李入為御史巡按三吳三吳多市魁積

蠹為強宗所庇彪佳悉捕至集其郡之士大夫問可殺否皆曰可殺則立斃之溫體仁當國不出者

八年從劉宗周講性命之學入掌京察復撫三吳明亡至其讀書之所曰寓園因歎曰山川人物固

屬幻影而人生已一世矣夜半自沈於水

何弘仁

舊浙江通志字仲淵山陰人崇禎丁丑進士知建平高要二縣城建平隄端溪皆為百世

之利尋授御史兩京沒投於台之白峯下死而復甦有土人負入陶介山削髮苦行遺命暴骸三日

野火
焚之

傅日炯

舊浙江通志字中黃諸暨人為諸生與其叔平公同師劉宗周明亡兩人相謂曰吾等義

固當死然俱有老母在亦惟白於母許死則死耳平公白於母不許日炯白於母許之遂赴湄池死

平公乃養
炯母終身

張焜芳

舊浙江通志字九山會稽人崇禎戊辰進士為戶科給事中請文震孟郵典薦黃道周陳

子壯金光宸成勇當大用是時溫體仁方推折正人自焜芳之論出而舉朝為之色壯降級歸尋起

用至濟
寧死難

王毓著

舊浙江通志字元趾會稽諸生師事劉宗周明亡草致命篇榜於宋衛士唐琦廟赴柳橋

自沈死留書上宗周曰毓著已得死所願先生早自決毋為王炎午所弔

潘集

舊浙江通志字子翔會稽人王毓著死為文祭之與友人痛飲約同死於是書几上曰昔年東

渡今復渡東水與月白吾骨不黑袖石自沈渡東橋下

熊汝霖

舊浙江通志字雨殷餘姚人任給事中崇禎時急於求才每為小人所乘汝霖言破格不

如循常聽聲不如採實又為上分別督撫優劣以為多不可以備倉猝也知無不言言無不盡熊聞元姜埰之獄劉宗周金光宸之去悉力廷諍降福建照唐明亡死於兵

余煌

舊浙江通志字武貞會稽人天啓乙丑進士第一授修撰遷左春坊會歲頻旱饑逋稅久蠲有

司附徵如故於經筵中極言之明亡自沈渡東橋下而死

嚴起恆

廣西通志山陰人崇禎辛未進士除刑部主事歷員外郎中遷衡永兵備副使十六年張

獻忠躡湖南吏民悉遁竄起恆獨堅守永州為孫可望將賀九儀所殺投屍於江屍流十餘里泊沙

渚間虎負之登崖葬於山麓

朱璋

舊浙江通志字鴻儒山陰人明亡人皆竄伏璋曰此日而生全歸之謂何乃書絕命詞二語於

几上潛往礁石躍水死

潘大成

新昌縣志字魯生以明經授金華訓導城陷父子死之

倪文徵

舊浙江通志字舜平山陰人為蒙師自給兼通醫術明亡市酒餉飲里中少年求辦一事

有諾之者借至墓所命掘坎自瘞眾駭欲散文徵曰此何事可誤我乎或尼之曰死義也今某某俱不死汝何自苦文徵曰人各行其志惟諸公玉子於成也人曰豈可使土侵膚乎以二缸贈之埋於坎中文徵跌坐其內命覆之已而聞內叩聲眾曰一時感興吾固知其欲出也發之文徵曰不熊人時不知方位耳北向再拜復命覆之

陳惟孝

河南通志紹興人崇禎間任邳縣主簿殉難

徐復儀

邵廷采徐復儀傳字漢官崇禎癸未進士明亡哭泣奔躄山頭夜不抵舍父恐其為豺虎

所食使人尋拾不獲竟投空谷以死

章正宸

紹興府志字羽侯會稽人崇禎辛未進士入庶常動以名節自砥遷禮科給事中疏劾宰

相王應熊不由枚卜非祖制忤旨下獄廷臣交章論救得釋歸里數年起原職陞吏科掌印劾樞臣

陳新甲奏革西廠大瑞人呼為鐵漢既而羣小側目潛行媒孽一日召對平臺上震怒同冢宰李日

宣等下獄賀逢聖疏救戍襄陽尋祝髮為僧不知所終

章自孝

鄉賢留祀冊山陰人華亭縣金山衛巡檢海寇橫劫率鄉勇拒之不克死

國朝

王之鼎

紹興府志字公調山陰人順治丁亥進士知祁縣有善政戊子冬雲中姜瓖叛諸邑淪陷

之鼎曰祁為太原藩籬無祁則太原無犄角之勢人心風鶴矣晝夜固守出奇奮擊擒賊將范計賊

不能長驅犯會城者實祁挫其克鋒也已丑三月賊悉銳攻祁援絕糧盡城陷被執罵不絕口遂遇

害家僕民壯皆不屈死事
聞贈按察司僉事

鄺引昌

紹興府志字叔典諸暨人山東沂州同知隨征湖廣遷判永州府賊騎圍城城陷昌及妻

王氏子尚英皆死之事
聞贈湖廣按察司僉事

賜祭葬廕

一子

王明臣

舊浙江通志字枚仲山陰人順治初為山東日照令四年土寇入城死之

吳錫綬

廣西通志字紫卿會稽人順治戊戌武進士選羅定都司時平樂久為賊據錫綬率所部

從撫蠻將軍傅弘烈集兵恢復五戰五捷直抵平樂賊吳世琮擁眾猝至決潯水以截援師錫綬飲

聞贈昭武將軍 血塵戰糧盡矢絕自刎以殉從死者數百人事

趙一桂

湖廣通志餘姚人順治間為沔陽州同知殉難康熙七年

詔贈沔陽州知州 遣官致祭

章德英

會稽縣志任神木縣典史值寇亂殉城死順治九年

賜祭一次

徐必遇

會稽縣志字杰吾順治初任泰興縣簿兵叛率眾出禦戰歿事

聞贈徵仕郎 賜祭廢一子

王焜

會稽縣志字爾旭任廣西宜山縣令會尚藩叛殉難

詔贈按察司僉事
賜祭葬廕一子

成廷樞

會稽縣志字德涵邑人蘇松提督前營參將
康熙甲寅會勦台州殉難

諭祭葬廕一

子都司

錢志泗

贛州府志山陰人興國縣典史甲寅之變屯
弁石昭最先發六月虔撫遣兵勦之志泗饋
餉行至江背峒寇猝至襲其後遂被殺是冬郡丞
顧岱來諭降始歸志泗首事

聞廕

一子
經厯

魯仁圻

陝西名宦冊會稽人以守備署興鎮右營把
總又署漢鳳營千總康熙十三年吳逆兵至

城陷不屈死之事
聞贈威烈將軍

賜祭葬廕

一子

陸之蕃

西江志會稽人鄱陽縣丞康熙十四年耿逆陷城殉難事

聞贈都司

無書

蔣鈞

會稽縣志隨父任江西順治丁酉武舉授衛千總陞福建海澄鎮中營守備會耿鄭二逆之變

陣亡

贈都司無書

賜祭葬廕一

子之濟

王質

四川通志山陰人康熙十八年任陝西高陵縣典史隨王進寶入川討逆以功陞渠縣知縣因

公赴省值餘孽復叛被執囚繫數月抗節不屈死之

贈四川按察司僉事給

祭葬廕子嗣忠

吳師貞

山陰縣志字雨吉庠生值閩寇煽亂檄授守備所遇獲捷守要地適逆犯界師貞以數百

人敵千衆奮勇衝突中炮火死次子聞父變率十餘騎衝殺覓父屍亦死之

薛人鳳

四川通志字仲輝會稽人康熙十九年任夔州府通判解餉赴榆州道經萬縣遭譚弘叛

贈僉事

劫於七里溝縛至天成山迫令降不從遂遇害

諸士英

舊浙江通志會稽人典史殉難

謹按士英不載何時殉難在何地方但舊志既列忠節不敢泯沒故錄入

蔡佳

舊浙江通志字麗菴蕭山人以甲寅閩變隨征為偽將曾養性所害

宣德仁

鄉賢留祀冊諸暨人中順治辛卯武鄉試授蘇州衛尉歷陞湖廣都司康熙戊辰督標裁

兵據城鼓噪倉猝莫禦德仁死之

王龍光

公舉事實字幼譽會稽人為諸生數因舉場年五十浙江巡撫范承謨延之課子承謨遽

福建總督邀同行甫半載而逆藩耿精忠亂作承謨以罵賊不屈被囚逆國署盡搜其男婦繫之龍光與無錫嵇永仁同行逆卒掙擄窮辱之驅至積屍間俄牽入授筆札令草安民檄啖以官二人不可遂羈獄中困頓不可忍永仁歷敘諸境為百苦吟龍光和之在獄三年康熙丙辰

王師破仙霞嶺精忠遂害承謨并龍光永仁等四十七

年

贈修職郎國子監助

教崇祀鄉賢

章啓周

鄉賢留祀冊會稽人湖廣巡檢性孝善事繼母後死逆藩吳三桂之難

謹按啓周元節不詳地名無他書可考然現列祀典又係忠節不敢泯沒謹就鄉賢冊錄入

周中鉉

公舉事實字子振一字念吾山陰人性慷慨重氣節能任事由崇明縣丞陞華亭知縣邑

舊多逋賦悉由吏胥侵蝕中鉉力行親催滾單法課送如額以誑誤落職

特旨復原官旋陞松江府知府因兩任華亭周知民情

土俗故在任多惠政雍正六年奉

旨特興江南水利上官廉其才凡修築築塘建壩置閘

一以任之辦理悉協二月二十九日督濬吳淞江

築隄江口適暮夜合龍風急水溜中鉉親與夫役

協力索斷舟沈覆溺而死

諭旨褒卹贈太僕寺卿廕一子入監

賜全葬與祭一次凡中鐸字傲我任常州府通判有能

聲

陳天錫

禮部照會本姓龐會稽人任雲南烏蒙府司獄雍正八年烏蒙土司叛天錫見鎮將不戰

先二日即手刃其妻自刎於官署奉旨從優賜卹贈知縣廕一子入監給全葬並一次致祭

妻張氏與天錫並祭給銀建坊入節孝祠

葉祚徽

禮部照會山陰人任雲南濱州吏目調魯甸司巡檢雍正八年烏蒙土司叛祚徽隨勦遇

害奉

旨賜卹贈縣主簿給全葬並一次致祭

丁珏

禮部照會山陰人由吏員任雲南揚武壩巡檢丁憂留滇委用署理青龍廠事務思普叛從勦

陣亡雍正十一年賜祭葬贈雲南縣主簿



浙江通志卷一百六十四